

Me Korinita Yai Leta Naona Paulo Wayahina

Buki Taina Wayahina

Buki taina a tau ginuma vivane Paulo. Tauna ya tutu-vivina v'-inuana nihenina meagai Korinita vaniahei, ya nau-wahe wayahina tomo-tau habuhabui Iesu ivitumahanei. Ka munia, tauna ni-tawanei ka tutu-vivina mani papania wayahia.

Ka munia dewa goyona ivin'-omo inu me Korinita yai ekalesia nihenina. Ka avaha Paulo vaneana nononi, tauna aitam leta ginumi va-tawanei omo me Korinita wayahia. (Tuta ataina wayahina leta-nana eha wayahikaia.) Taii leta-nana ivaniahei, ka avaha Paulo ya nu-anua inononi, yai vi-tanai tupwai mamaei tavine wayahina kadu aniani wayahina, e taii Paulo yana leta iginumi dewaia wayahi.

Ka Paulo ya nuanua tau ekalesia-naia yai dewa ivo-vi-tunuhi. Taii yai goyona tupwai taina, itana-vewani mani yoko mani yoko wayahia, ka onoto aitam kenene goyona dedewei. Ka kadu avi tuta vita tunina tunina ivaniahei, taii eha matataui ita-nau-yanahi, kate tau veimea yai gabemani^V nihenina mataia ivi-kotukotui. Tau veimea-naia eha Iesu a tau vitumahana. Wayahina, leta taina nihenina Paulo tau ekalesia

Korinita nihenina yapoyapoi dewaia habuhabui wayahia. Ka kadu leta taina nihenina Paulo kadu me Korinita yai vi-tanai nau-patai. Ka kadu Paulo vonei vivane dewa-vidovidoha mani dewa habuhabui vane-tawanei.

Pai Vi-putu

¹ Yauke Paulo, ka Yaubada vi-nua-dadaneu avi-tau hae ananiu Iesu Tau Ito-yavuha wayahina. Yauke vaneika ana wava Sositenesi nui

² itomi me Korinita yami leta taina aginuginumi. Taumi avaha Yaubada ya tau ekalesia, kadu Iesu Tau Ito-yavuha avaha yawaimi vo-vinei ahihimiata. Tomotau papani aitamoata aitamoata wayahia Kauvea Iesu Tau Ito-yavuha a wavea iviama. Ka tauna kadu honemi tomotau-naia nui yai Kauvea kadu yaka Kauvea un'-awa-davedavei.

³ Ka yama nuanua Yaubada Amaka ka Kauvea Iesu Tau Ito-yavuha am-venena awawaehina kadue nua gomagomanina ivenevenemi uvaniahei.

Paulo Ya Nau-kaiwa Me Korinita Wayahi

⁴ Tuta tuta yau Yaubada anau-kaiwei taumi wayahimi. Iuna tauna avaha am-venena awawaehina venemi uvaniahei yami vi-niana Iesu Tau Ito-yavuha wayahina.

⁵ Ka vona ahiahina, tauna nui avaha uvi-tau kaikaiwabo dewa habuhabui wayahi. Ka ataina ya nua-uya habuhabuna wayahimia. Wayahina, ami pata una-ipupu bagibagina.

⁶ Ika, nonova Tau Ito-yavuha Vaneana Ahi-ahina ahaehaeyemi uvitumahanei. Ka ataina yawaimi nihenina avaha yau hae uvaniahei vivane tunuhina ana noe.

⁷ Wayahina, ataina eha uvi-kutakuta nau-iaia-ia-naia ivin'-omo Nuana Ahihinata wayahina. Iuna tauna avaha am-venena-kavovo ahiahina aitamoata aitamoata venevenemi vo-vi-aiami, e na dewa-haiawami upotapota a itoava yaka Kauvea Iesu Tau Ito-yavuha na-mavi-havine wayahina.

⁸ Ka Nuana Ahihinata vo-vi-bagibagimi, utoha-vi-anaimi a itoava tuta pai nau-yehata wayahina deina. Akaka auyewana wayahina, itomi tomotau maihimi umimini yaka Kauvea Iesu Tau Ito-yavuha matana, iuna tauna ivaitemi deina.✧

⁹ Vona ahiahina, Yaubada ya nuanua tauna honemi natuna nui uvi-niana, vivane yaka Kauvea Iesu Tau Ito-yavuha. Wayahina, nau-wawanika kavitumahanei Yaubada yana vona ka yana dewa aitamoata.✧

Eha Nau-wawanika Katana-vewana

¹⁰ Vavaneiu, yaka Kauvea Iesu Tau Ito-yavuha bagibagina, ka yauke a tau hae ananiu aitam. Wayahina, yau nuanua ananina wayahimi habuhabumi un'-awaeha aitamoata yami ipupu wayahina, ka eha aitam tana-vewana na-mae yami ekalesia nihenina. Avona-havinemi uvi-yoko aitamoata, ka nau-wawanimi unuanua

✧ **1:8:** 1Te 3:13; 5:23. ✧ **1:9:** 1Io 1:3; 1Te 5:24.

aitamoata, kadu nau-wawanimi yami nuanua aitamoata.✧

¹¹ Vavaneiu, avonevonemi deina, iuna tupwai Kiloe yana yoko avaha imataedau uvi-vonavona wayahimia.

¹² Yami vi-vonavona tanoi ivin^l-omo, iuna aita-moata aitamoata wayahimia uvonavona tunina. Tupwami uvonavona, “Itoi Paulo yana yoko,” ka tupwami uvonavona, “Itoi Apolosi yana yoko,” ka tupwami uvonavona, “Itoi Pita yana yoko,” ka tupwami uvonavona, “Itoi Tau Ito-yavuha yana yoko.”✧

¹³ Yami yoko tunina tunina. Wayahina, yaka Tau Ito-yavuha utana-vewani, a? Medeina? Yauke Paulo itutu-pwatau, e yami dewa goyona wayahi aniga? Eha. O medeina? Tutana ami bapitaiso uvaniahei, kaiwadi, uvaniahei yauke Paulo au wavea? Eha.

¹⁴ Ataina Yaubada anau-kaiwei. Iuna nonova eha habuhabumi ata-vi-bapitaisoemi. Vona ahi-ahina, aitonuata wayahimia avi-bapitaisoei, vi-vane Kirisipusi, Gaiusi ainua.✧

¹⁵ Aituhu nonova habuhabumi avi-bapitaisoemi, kaiwadi aitam iuna mamae ataina tupwami mwagemwagemi ami pata uvonavona yauke Paulo au wavea avi-bapitaisoemi.

¹⁶ (O, ika, nuau ipani, kadu aitam onoto ana wawa Sitepanasi yana yoko nui avi-bapitaisoei. Kaiwadi, avaha habuhabui ai wawa atomani o tupwai nuau panipani.)✧

✧ **1:10:** Pili 2:2. ✧ **1:12:** 1Ko 3:4; Dew 18:24-28. ✧ **1:14:** Dew 18:8; Rom 16:23. ✧ **1:16:** 1Ko 16:15.

17 Ka unononi. Tutana Tau Ito-yavuha au veimea veneu apaipaisewa tauna wayahina, paisewana eha tomotau avi-bapitaisoe. Tauna au veimea veneu, ka vi-tuneu Vaneana Ahiahina anaunau-waheyeyi. Ka kadu ya nuanua avi tuta anaunau-wahe, eha nau-wawaniu anaunau-wahe tomotau sinasinapui yai ipuipupu deina. Eha. Aituhu yau dewa deina, kaiwadi, apaina tomotau yai vitumahana yau nua-uyea vin'-omo. Kate avi tuta anaunau-wahe, nau-wawaniu Tau Ito-yavuha yan' aniga ai nahenahea vaneana tomotau mataia asi-vin'-omane, idudueyeyi. Iakwa, e yan' aniga bagibagina in'-anamane tunuhina.

18 Tau Ito-yavuha yan' aniga ai nahenahea vaneana an' anamana ainua imamaei. Aituhu aviyaivia vita-vovona a etawana wayahina ineine, tau wayahi Vaneana Ahiahina vivane mwagemwagena. Ka aituhu aviyaivia wayahikaia ito-yavuha kavaniahei, akanai Vaneana Ahiahina vivane Yaubada ya bagibagi wayahika.✧

19 Taina wayahina Iginuma voneka, ivona,

“Tau nua-uya yai nua-uyea inua-vane.

Kate yai nua-uyana avita-vovoni.

Kadu tau anamana inuanua

dewa habuhabuna avaha ianamane-yehai.

Kate anamanana abou-ohoi.”✧

20 Wayahina, medeina kana-vona tanopi a tau nua-uya wayahi? O kadi medeina kana-vona

✧ 1:18: Rom 1:16. ✧ 1:19: Isa 29:14.

veimea a tau anamana wayahi? O kadi medeina kana-vona tau ipupu bagibagina wayahi? Vona ahiahina, Yaubada avaha viwaveneka nua-uyana habuhabuna tanopi taina wayahina vivane dewa mwagemwagena kadu awakabina.✧

²¹ Yaubada ya nua-uya tomotau yai nua-uya vane-tawanei. Wayahina, eha aka pata tauna kavaniahe nua-uyana tanopia wayahina. Eha. Kate Yaubada etawana tunina vo-vi-aiiaia, vivane Vaneana Ahiahina anaunau-waheyei. Tau nua-uyaia tanopia inuanua Vaneana Ahiahina vivane mwagemwagena. Kate aituhu aviyaivia Vaneana Ahiahina ivitumahanei, tau i to-yavuha ivaniahe i Yaubada wayahina.✧

²² Tomotau yoko ainua imamaei i to-yavuhana itutu-haini. Aitam yoko me Iudea. Tau i yai nuanua naona aitam iaiaya bagibagina idueyei, e munia iawaehei ivitumahanei. Kadu aitam yoko tau i eha me Iudea. Tau i yai nuanua naona ipupu inononi, ka aituhu ivi-nua-dadani ipupuna yai nua-uya ainua iawaehei aitamoata, akanai munia ivitumahanei.

²³ Ka itoai yama dewa Tau Ito-yavuha yan' aniga ai nahenahea ahaehaeyei. Ka avi tuta me Iudea Vaneana Ahiahina inononi, tau i mataia vaneana ihanuana. Wayahina, eha yai nuanua. Ka avi tuta tau i eha me Iudea Vaneana Ahiahina inononi, tau i mataia vaneana mwagemwagena. Wayahina, eha yai nuanua.✧

²⁴ Kate yoko v'-itonuna mamaei, ka nihenina tau i me Iudea tupwai imamaei kadue tau i eha me

✧ **1:20:** Isa 19:12; 33:18; 44:25; Job 12:17. ✧ **1:21:** Mat 11:25.

✧ **1:23:** Rom 9:32; 1Ko 2:14.

Iudea tupwai imamaei. Ka Yaubada yoko-nana vi-nua-dadanei, ka honei. Ka tau i yoko-nana ni-henina wayahi, Tau Ito-yavuha vivane Yaubada ya bagibagi kadu tauna Yaubada ya nua-uya ainua.✧

²⁵ Aituhu Yaubada yana dewa mwagemwagena tomotau tupwai mataia, akanai yana dewa tomotau nua-uyai habuhabui vane-tawanei. Kadu aituhu Yaubada yana dewa ihanuana tomotau tupwai mataia, akanai yana dewa tomotau yai bagibagi bagibagi-tawanei.✧

²⁶ Vavaneiu, pai dune avenemi. Nonova, tutana Yaubada honemi, itomi avi tomotau? Unuani. Eha habuhabumi ami anamana ananina mani tomotau mataia. Ka eha habuhabumi tau nua-uya, o tau bagibagi, o kadi tau kaikaiwabo. Eha.✧

²⁷ Ka udueyei. Yaubada ya nuanua vi-nua-dadanemi, ka itomi eha nuanua-uyami, kadu eha bagibagimi. Tauna dewei deina, iuna ya nuanua tau nua-uyaia ini-yauyau veneveni itomi yami dewa wayahia, kadu ya nuanua tau bagibagi ini-yauyau veneveni itomi tomotau ihanuami wayahimia.

²⁸ Tau ma' tanopi mataia itomi ami wawa kikitui, kadu inau-nikonikoemi. Ka kadu tau mataia itomi eha aitam aviani. Kate Yaubada vi-nua-dadanemi, iuna ya nuanua aviani tomotau nuai epai, akanai tauna dewaia habuhabui na-vita-vovoni.

²⁹ Wayahina, eha aitam koiaka ana pata tauna ana heta yana dewa wayahina na-vona-vanevane Yaubada matana.✧

✧ **1:24:** Kol 2:3. ✧ **1:25:** 2Ko 13:4. ✧ **1:26:** Mat 11:25; Iam 2:5.

✧ **1:29:** Epe 2:9.

³⁰ Vona ahiahina, Yaubada tauna ya nuanua wayahina kadu tauna yana dewa wayahina itomi Iesu Tau Ito-yavuha nui bou-nuemi. Ka ataina, Iesu avaha vi-nua-uya wayahika, ka nua-uyana omo Yaubada wayahina. Wayahina, ataina itoka tunutunuhika Yaubada matana, iuna Iesu, kadu kavi-tau ahihikata, iuna Iesu, ka kadu ataina Yaubada avaha yavuhika Satana wayahina, iuna Iesu.✧

³¹ Wayahina, ataina itoka aka pata kavona-vanevane, ka iuna vivane Yaubada yana dewa wayahika. Ka Iginuma voneka deina, ivona,

“Aituhu aviyaivia yai nuanua
ivona-vanevane,
akanai tau nau-wawani
Kauvea yana dewa wayahi
ivona-vanevane.”✧

2

Paulo Ya Nau-wahe

¹ Yaiiau, nonova tutana avin'-omo wayahimia Yaubada yana vona tunutunuhina kadu hivahivana anaunau-waheyemi, ka eha vona mamanaina wayahina o vona tutuaina wayahina ata-haeyemi. Kadu eha anamana ananina wayahina ata-haeyemi. Eha.

² Kate nonova tutana yauke nui kamamaei, yau nuanua dewa ananina habuhabuna anua-pania, ka Iesu Tau Ito-yavuha ana heta anuani. Tauna

✧ 1:30: Ier 23:5-6. ✧ 1:31: Ier 9:24.

kadu yan' aniga ai nahenahea, dewaia ainua ahaehaeyemi.

³ Wayahina, nonova tutana avin'-omo wayahimia, yauke ihanuau kadu ate-viviha nui atatatava ininiu habuhabuna wayahina.✧

⁴ Ka kadu yau nau-wahe kadu yau viwave-nena wayahimia eha vona sinasinapui wayahia ta-vin'-omo. Kate Nuana Ahihinata ya bagibagi yau nau-wahe ivaitei.✧

⁵ Akaka uvitumahanei, ka yami vitumahana eha ta-vin'-omo tomotau yai vona sinasinapui wayahia. Kate yami vitumahana vin'-omo Yaubada ya bagibagi wayahina.

Anamana Ahiahina

⁶ Wayahina, aituhi aviyaivia avaha Nuana Ahihinata yana dewa wayahina inua-hau, tau iawaehei yau nau-wahe vivane nua-uya. Kate nua-uyana nua-uya tunina. Eha nua-uya tau nua-uya tanopia wayahia deina, kadu eha nua-uya tau veimea tanopia wayahia deina. Ataina tau veimeai yai bagibagi opuopu, ka apaina na-iakwa.

⁷ Kate nua-uyana ahaehaeyei vivane Yaubada ya nua-uya. Tauna ya nua-uya hivahivana, ka tau ma' tanopi eha ai pata yai bebewa wayahina inua-hau. Tuta naona wayahina Yaubada ya nu-anua nua-uyana hivahivana wayahina didigaka kavaniahei. Naona tauna ya nuanua deina, e munia tanopi taina vevewanei.

⁸ Udu. Eha aitam koiaka tanopi taina a tau veimea wayahia nua-uyana ita-nua-hau. Iuna

✧ 2:3: Dew 18:9; 2Ko 10:1. ✧ 2:4: 1Te 1:5.

aituhu inua-hau, akanai, eha ai pata Kauvea Didigana ai nahenahea itutu-pwate.

⁹ Kate eha aitam wayahia ita-nua-hau. Wayahina, yai dewa vin'-omo Iginuma voneka deina, ivona,

“Eha aitam koiaka dewana ita-dueye,
 ka eha aitam koiaka dewana vaneana
 ita-nononi,
 ka eha aitam koiaka ana pata
 dewana wayahina ita-nuanua.
 Kate aituhu aviyaivia Yaubada idewa-nuanuaiei,
 tauna tau wayahi dewana vo-vi-aiaia,
 ka veneveni ivaniahei.”[☆]

¹⁰ Ka itoka wayahikaia Yaubada avaha yana vona hivahivana si-vin'-omane kanua-hau Nuana Ahihinata wayahina. Nuana Ahihinata dewa habuhabui wayahi naunau-nene kadu anamanei. Ka tauna kadu Yaubada ya nuanua hivahivana wayahina naunau-nene kadu anamanei.

¹¹ Dewa ainua abou-viwavei udueyei. Itoka tomotau wayahika, nuaka ana heta ana pata aviani nihenikaia kanuanua n'-anamanei. Ka Yaubada Nuana Ahihinata ana heta ana pata aviani Yaubada nihenina n'-anamanei deinake.

¹² Wayahina, itoka eha Nuana baina tanopia mamaei kata-vaniahe. Eha. Kate Yaubada tauna Nuana Ahihinata vi-tunei omo wayahikaia, ka avaha Nuana kavaniahei nihenikaia. Ka tauna ana pata dewa habuhabuna Yaubada

[☆] **2:9:** Isa 64:4.

avaha am-veneneyeka na-vo-vi-maheteka, kan'-anamanei deinake.

¹³ Wayahina, yama nau-wahe kadu yama vi-wavenena eha tau ma' tanopi yai nua-uya wayahina ta-vin'-omo. Kate naona Nuana Ahihinata viwaveneai, e munia tomotau aviwavenei. Ka ataina vona tunutunuhina Nuana Ahihinata wayahina avo-vi-mahetei tau avaha Nuana Ahihinata ivaniahei wayahia.

¹⁴ Kate aituhu aviyaivia eha Nuana Ahihinata ita-vaniahe, tau eha ai pata am-venena awawehina tunina tunina Yaubada Nuana Ahihinata wayahina ivin'-omo ivaniahe. Tomotau eha dewaia ita-nua-hau, kadu tau wayahia dewaia awakabi. Inuanua deina, iuna naona tau nau-wawani Nuana Ahihinata in'-anamanei, e munia ai pata dewaia in'-anamanei.

¹⁵ Kate aituhu aviyaivia avaha Nuana Ahihinata ivaniahei (itoka deina), tau ai pata dewa habuhabui inau-yanahi kadu ivi-nua-dadani tunuhina. Wayahina, mani tomotau eha nau-wawani yaka dewa ina-nau-yanahi.

¹⁶ Ka Iginuma voneka deina, ivona,

“Koiaka Yaubada ya nuanua anamane?
O koiaka ana pata Tauna viwavene?
Eha aitam.”

Kate itoka tau vitumahana avaha Tau Ito-yavuha ya nuanua kavaniahei, iuna Nuana Ahihinata avaha mamaei nihenikaia.✧

✧ **2:16:** Isa 40:13.

3

Yaubada Ya Tau Paisewa

¹ Ka yaiau, nonova tutana yauke nui kamamaei, itomi eha tomotau avaha Nuana Ahihinata ivani-ahēi deina. Eha. Itomi tau ma' tanopi taina deina, o kadi meamea deina. Iuna itomi ihanuami yaka vitumahana Iesu wayahina. Wayahina, eha au pata ata-nau-wahe nua-uya ito-niuna wayahina wayahimia.

² Nonova aviani yau nuanua avi-animi, eha ami pata aninina un'-ani, kate nunu ana heta nau-wawanimi. Iuna eha ami pata aniani panina un'-ani. Kadu tuta ataina itomi yami dewa aitamoata deina.✧

³ Iuna nonova a itoava tuta ataina wayahina, yami dewa ka tau ma' tanopi yai dewa aitamoata. Aituhu uvi-gwahegwahea wayahimia, kadue aituhu uvi-bwanou, dewaia wayahia kadueyei itomi vivane tau ma' tanopi, iuna tau ma' tanopi yai dewa iveimeyemi.✧

⁴ Ka tupwami uvonavona, “Itoai Paulo avi-munie.” Ka tupwami uvonavona, “Itoai Apolosi avi-munie.” Avi tuta uvi-vonavona deinake, itomi medeina? Vona ahiahina, yami dewa tau ma' tanopi yai dewa aitamoata deina.✧

⁵ Unononi. Apolosi koiaka? Kadu yauke, Paulo, koiaka? Itoai ama inua ama wava eha ananina. Itoai vivane Yaubada ya tau paisewa-kavokavovo, ka aivaitemi Tau Ito-yavuha uvitumahanei. Kauvea tauna ya

✧ **3:2:** Ebe 5:12-13; 1Pi 2:2. ✧ **3:3:** 1Ko 1:10-11. ✧ **3:4:** 1Ko 1:12.

tau paisewa aitamoata aitamoata yai paisewa vi-nua-dadani.✧

⁶ Wayahina, yauke aitam tau baguna deina, ka naona waipei abagubaguni, ka Apolosi aitam tau dune-vi-avina deina, wayahina munia, tauna daudau ito-iwaihahi bagunana wayahina. Kate Yaubada ana heta ana pata waipei-naia na-vo-vi-tabotaboi.

⁷ Tau bagunana kadu tau dune-vi-avinana eha aitam aviani. Kate Yaubada a heta-ohota kan'-awa-davedavei, iuna tauna ana pata baguna na-vo-vi-tabotaboi.

⁸ Aituhu tau baguna ka tau dune-vi-avina ainua kabou-viwavei, kadueyei ainua eha tunina. Iuna apaina Yaubada tauna ya tau paisewa aitamoata aitamoata ama nau-pata veneai, yama paisewa nau-wawani deina.✧

⁹ Ataina tuta Yaubada ya baguna nihenina apaipaisewa, ka itomi vivane bagunana.

Kadue itomi vivane Yaubada yana yona.

¹⁰ Yaubada am-venena awawaehina veneu, ka avutu a paisewa avi-putui. Ka ohona ka unu-tutu abou-vidovidohei, tau yona ahihi-vainei ipaipaisewa deina. Ka ataina tuta mani tomotau iyonayona yau paisewa hetana. Wayahina, anau-vi-avinimi aitamoata aitamoata wayahimia, nau-wawanimi mai-nuami uyoneyonei.

¹¹ Iuna eha kadu aitam unu-tutu ta-mamae. Yaubada avaha Iesu Tau Ito-yavuha ana heta vi-nua-dadanei, ka tauna a heta-ohota unu-tutu-nana.✧

✧ **3:5:** Dew 18:4, 11, 27-28.

✧ **3:8:** Mat 16:27; Epe 2:20-22.

✧ **3:11:** Isa 28:16; 1Pi 2:4-6.

12 Ka apaina tau yona tupwai ivin'-omo, e goulav, o kadi silivav, o kadi hanu ai dune ahihi-vainei wayahia hetana iyoneyonei. Tai yai yoana bagibagina kadu ahiahina, yapanava, o agumo, o pwana deina. Ka apaina tau yona tupwai ivin'-omo, e yai yoana ihanuai iomaomanei, kepoki, o ipoupou, o imunumunu deina.

13 Wayahina munia, Tau Ito-yavuha yan' auyewa wayahina, vivane Auyewa pai nau-yehata wayahina, tomtau aitamoata aitamoata yai paisewa ai dune kadudueyei, kadi ahiahina o kadi goyona. Iuna auyewana wayahina ai ananata vin'-omo, ka ai-nana paisewa aitamoata aitamoata na-vito-nubui, ka paisewai na-si-vin'-omanei kadudueyei.✧

14 Ka ai-nana na-iakwa, aituhu avi paisewa imimini, akanai tau paisewai ai nau-pata ahiahina ivaniahei.

15 Kate aituhu avi paisewa n'-anai-yehai, akanai tau paisewai ai nau-pata habuhabuna itutu-haini. Tai nuai ai heta ito-yavuha ivaniahei, eha ani-hoina nuai n'-anai deina.

16 Kaiwadi, avaha uanamanei itomi vivane Yaubada ya Manua Vito-potana, o eha? Tauna Nuana Ahihinata nihenimia mamaei.✧

17 Wayahina, nau-wawanimi udune-vivinimi. Aituhu koiaka Yaubada ya Manua Vito-potana na-vita-vovoni, vona ahiahina, apaina Yaubada tomtauna na-vita-vovoni. Iuna Yaubada ya Manua Vito-potana vivane ahihinata, ka Manuana vivane itomi tau ekalesia.

✧ 3:13: 1Ko 4:5. ✧ 3:16: 1Ko 6:19; 2Ko 6:16.

18 Aitamoata aitamoata wayahimia eha nau-wawanim enonom. Aituhu aitam wayahimia enuanua avaha evi-tau nua-uya tau ma' tanopi mataia, akanai wamke nau-wawanim nua-uyana evihahaiei, e nua-uya ahiahina Yaubada wayahina evaniahei. Aituhu Yaubada ya nua-uya wayahima, akanai evi-tau nua-uya.

19 Iuna avi nua-uya tau ma' tanopi nuai epai ananina, akanai nua-uyana mwagemwagena Yaubada matana. Iuna Iginuma voneka, ivona,

“Yaubada tau nua-uyai vi-daei
tau yai nua-uya wayahina,”✧

20 ka kadu aitam ivona,

“Kauvea avaha tau nua-uyai
yai nuanua anamanei
vivane awakabina.”✧

21 Wayahina, eha aitam koiaka nau-wawani na-vona-vanevane tau ma' tanopia yai dewa wayahi. Iuna Yaubada avaha dewa habuhabuna venemi wayahimia mamaei,

22 vivane yauke Paulo, ka Apolosi, kadu Pita ami tau ivaita, kadu tanopi taina, kadu yawaimi, kadue yami aniga, ka kadu tuta ataina, kadu tuta tepakaia. Yaubada avaha nau-iaivai habuhabui venemi,

23 kadu itomi vivane Tau Ito-yavuha ya tomotau, kadu Tau Ito-yavuha vivane Yaubada natuna.

✧ 3:19: Iob 5:13. ✧ 3:20: Sam 94:11.

4

page top Tau Ito-yavuha A Tau Hae Yai Ma' Ai Vita

¹ Wayahina, nau-wawanimi unuanua itoai tau hae wayahiai. Itoai vivane Tau Ito-yavuha ya tau paisewa-kavokavovo, ka Yaubada tauna yana vona tunutunuhina ka hivahivana viwavenai, kadu veimeyeai vonaia ahaehaeyei tomotau wayahia.

² Ka itoai, kadu mani tau paisewa habuhabui deina, ama veimea ananina yama Kauveana avi-muni-waiwaiei, eha anua-pani.✧

³ Aituhu yau paisewa eha tunuhina matamia, o aituhu umana-giboeu, o aituhu mani tomotau inau-yanahiu, dewaia eha aitam aviani wayahiu. Vona ahiahina, yauke taua eha yau dewa ka mani tomotau yai dewa ainua abou-viwave, e adudueye ahiahina o kadi goyona.

⁴ Niheniua au ayaunena hadahadanina yauke mataua, kate yauke eha dewa habuhabui at'-anamane-yehai. Aituhu yau pai ini-yauyau mamaei Kauvea matana o eha, kaiwadi, tauna ana heta dewana anamane-yehai, kadue tauna ana heta ana pata ahiahina ka goyona vi-nua-dadani tunuhina. Iuna tauna vivane yau tau vaneneha.

⁵ Wayahina, itomi eha nau-wawanimi yaiami yai dewa umai-nau-yanahi matamia vivane ahiahi o goyogoyoi. Akanai, kapotapota Kauvea ya vin'-omana an' auyewa wayahina. Ka auyewana wayahina, avi dewa tomotau

✧ 4:2: Luk 12:42.

ihivehivei novanovana wayahina, tauna dewaia na-si-vin'-omanei maheta wayahina. Kadu avi nuanua tomotau nuai nihenia imamaei, vivane yai nuanua anani, tauna dewaia na-si-vin'-omanei. Ka auyewana wayahina aitamoata aitamoata itoka tomotau wayahikaia aka nau-pata kavaniahei Yaubada yan' apa-vidovidoha wayahina.✧

⁶ Yaiiau, pai dune-nana avaha avenemi yauke Apolosi ama inua wayahiai, iuna yau nuanua uvidoha wayahina. Kadu yau nuanua pai dune-nana wayahina ami pata aitam vona tana-minikuna an' anamana unua-hau, ivona,

“Eha Iginuma uvenau-tawane.”

Yau pai mini ananina taina. Eha nau-wawanimi yami tau eta-naonao wayahi uvi-vonavona, vivane aitam wayahia yami nuanua, wayahina uvona-vanevane tauna wayahina. Ka kadu aitam wayahia eha yami nuanua, wayahina tauna umana-giboiei.✧

⁷ Koiaka vevevanemi? Itomi tunimi tunimi, ka dewana vivane Yaubada ya vevevana. Ka kadu aviani wayahimia? Vona ahiahina, dewaia wayahimia iuna Yaubada venemi. Ka dewaia wayahi uvona-vanevane, taumi uveve-wanei deina. Kate eha. Dewaia uvaniahei Yaubada wayahina. Wayahina, yami dewana eha ahiahina.✧

⁸ Kaiwadi, matamia itomi avaha yami nuanua

✧ 4:5: 1Ko 3:8. ✧ 4:6: Rom 12:3. ✧ 4:7: Rom 12:6.

habuhabuna uvaniahei, a?^a Kadu matamia itomi avaha uvi-tau kaikaiwabo nuami nihenina, kadu avaha uvi-kiniV, ka Tau Ito-yavuha nui uveimeyei, kate eha itoai nui! O, yaiau, yau nuanua ananina wayahimi vivane uvi-kiniV Yaubada matana. Iuna, aituhu deina, akanai itomi itoai nui kavi-kiniV!

⁹ Avonavona deinake, iuna anuanua yawaiai wayahi tanopi taina wayahina. Yaubada itoai tau hae ananiai pai vi-ai goyona veneai, e bou-opuai akanai pai nau-yehata avin'-omo, tau me Rom ai tau veimea iyohoyohoni deina. Ka yai dewa iomaomanei vahitau manimanini nui ivi-naua, e me Rom inau-hohona idunedune pai vinepa wayahi. Ka munia, vahitau tau yohoyohonina ina-nau-vi-anigi, yawai ina-iakwa. Ka itoai yawaiai tau yohoyohonina deinake, ka tau ma' tanopi idunedune wayahiaia, kadue anelose wahuma idunedune wayahiaia.

¹⁰ Itoai ama dune matamia tau mwagemwageai Tau Ito-yavuha wayahina deina, kate itomi ami dune matamia tau nua-uya Tau Ito-yavuha wayahina. Itoai ama dune matamia ihanuai, kate itomi ami dune matamia vivane bagibagimi. Tomotau iapa-vidovidohemi, kate itoai iapa-goyogoyoeai!

¹¹ Tuta nonova a itoava babau ataina wayahina itoai am anavovo, magari ayaya, ama kwama si-yehiyehitai, tomotau manimanini idewa-goyogoyoeai, ka eha yama manua.✧

¹² Itoai nimaia apaipaisewa toyoina, ka aituhu

^a **4:8:** Paulo vona taina nihenia me Korinita etutuia venauei.

✧ **4:11:** 2Ko 11:23-27.

aviyaivia ibwanatai, akanai itoai anau-iaivai. O avi tuta tomotau idewa-goyoeai iuna yama dewa eha yai nuanua, akanai atoha-vi-anai.✧

13 O avi tuta tomotau ipupu-kedeweyei, akanai aipupu-tomotauei. Tuta nonova a itoava babau ataina wayahina itoai haina mavununa tomotau mataia deina, wayahina ivihahaieai.

14 Eha yau nuanua vonana wayahina ini-yauyau uvaniahe, kate yau nuanua ananina anau-vi-avinimi natunatu adune-nuanuaiemi deina.

15 Kaiwadi, tuta tepakaia wayahina yami tau dune-vi-avina Tau Ito-yavuha nihenina ai yau ivi-habu-vainei. Kate amami ai yau eha habuhabui. Iuna yauke au heta-ohota Iesu Tau Ito-yavuha Vaneana Ahiahina anaunau-waheyemi, uvitumahanei, e yauke taua amami deinake, iuna yawaimi uvaniahei Iesu Tau Ito-yavuha wayahina.✧

16 Wayahina, natunatu, agwagwaheyemi, kadu aviamemi yami pai dune wayahina yawaiu un^l-epei, uv^l-iuneu.✧

17 Wayahina, natu ana wava Timoti, adune-nuanuaiei avi-tunei omomo itomi yami ekalesia wayahimia. Tauna yaka Kauvea vi-muni-waiwaiei tunuhina, ka na-ivaitemi yau dewa habuhabuna unuani. Dewa ainua iawaehi aitamoata. Dewa naona yau dewa Tau Ito-yavuha Iesu matana, kadu dewa v^l-inuana yau viwavenena ekalesia habuhabui wayahia papani tunina tunina nihenia.✧

✧ 4:12: 2Te 3:8; Mat 5:44. ✧ 4:15: Gal 4:19. ✧ 4:16: Pili 3:17.

✧ 4:17: Dew 19:22.

18 Ka tupwami avaha unua-vane, iuna unuanua tuta tepakaia wayahina eha avin'-omo wayahimia.

19 Kate udu! Aituhu yaka Kauvea n'-awaeheu, tuta eha ani-hoina na-iakwa, e an'-omo wayahimia. Ka avi tuta avaniahami, akanai au pata tau nua-vane-naia yai ipupu anononi tanihaua, kadu aituhu avi bagibagi wayahia mamaei, au pata mataua adueyei.

20 Iuna Yaubada ya pai veimea nihenina, vonata eha aitam aviani, kate bagibagi yaka dewa nihenia vivane dewa ananina.✧

21 Wayahina, medeina yami nuanua yau vin'-omana wayahina? Kaiwadi, manimaniniu avin'-omo wayahimia, e dewa-yaiyai avi-nua-dadani yami dewa goyona wayahina, o kadi dune-nuanuai nui kadu dewa-bigana nui avin'-omo wayahimia anau-vi-taumi? Itomi yami dewa wayahia uvi-nua-dadani akanai.

5

Tau Kenekenene Kadu Nua-vane

1 Avonavona deina iuna avaha kenene wayahimia vaneana anononi, ka kenene goyona goyo-tawanei. Eha dewana kata-vaniahe tau eha tau ekalesia wayahia. Aitam onoto wayahimia ayo-yavayavanina epei, ikenene.✧

2 Kate itomi yami dewa medeina? Ia! Itomi udewa-haiawa kadu uvona-vanevane yami nua-piaha onotona yana dewa wayahina! Itomi nau-wawanimi unua-vita ananina, kadu uvi-mohai onotona ya dewana wayahina. Kadu

✧ 4:20: 1Ko 2:4. ✧ 5:1: Lev 18:7-8; VV 22:30.

nau-wawanimi onotona kenenena dewei yami ekalesia wayahina uvitu-voi-one.

³ Ataina tuta yauke baina amamaei, kate niheniua, nuau nihenina, meagai Korinita wayahina nui kamamaei. Ka avaha onoto-nana anau-yanahi. Wayahina, ataina yami leta taina nihenina ahaehaeyemi nui kanau-hohona deina, ka nui kavi-nua-dadana deina.✠

⁴ Tuta tepakaia wayahina, avi tuta unau-hohona yaka Kauvea Iesu a wavea, kadu yauke nui kamamaei nuaka nihenia, kadu aituhu yaka Kauvea Iesu ya bagibagi mamaei,

⁵ aveimeyemi tau goyo-nana Satana nimana uboui. Akanai Satana onoto-nana ininina na-vita-vovoni, kate tuta tepakaia wayahina, avi tuta Kauvea na-mavi-havine wayahina, tauna onoto-nana nuana na-ito-yavuhi.✠

⁶ Itomi yami vona-vanevanena eha ahiahina. Avaha uanamanei, aituhu palaua a pai vo-vi-nata kikituna palaua nui kavinei, tuta eha ani-hoina na-iakwa, e palauana habuhabuna vanevane, a?✠

⁷ Wayahina, nau-wawanimi pai vo-vi-nata tutuaina, vivane onotona kenenena, un^l-epa-yavunei, e uvi-yoko ahiahina deina, palaua vovouna deina, ka eha aitam pai vo-vi-nata nui. Yau vona baimina nihenina palaua eha a pai vo-vi-nata nui atomani, iuna Tau Ito-yavuha, tauna yaka lamiV Itouvuha Toneina wayahina. Ka avaha laminaV ivi-nomui wayahika.✠

✠ 5:3: Kol 2:5. ✠ 5:5: 1Ti 1:20. ✠ 5:6: Gal 5:9. ✠ 5:7: Isa 53:7; 1Pi 1:19.

8 Wayahina, nau-wawanika toneina kadedewei, kate eha pai vo-vi-nata tutuaina goyona wayahina kadedewe. Pai vo-vi-natana vin'-omo yaka nua-goyo wayahina. Kate nau-wawanika toneina kadedewei palaua vovouna wayahina, ka palauana eha a pai vo-vi-nata nui. Palauana vivane yaka nua-vidoha kadu yaka vona tunutunuhina.*

9 Nonova yami leta aitam nihenina^a ahaeyemi avona, “Eha tau kenekenene nui uvi-yaiana”.

10 Ka tutana avonemi deinake, eha yau nu-anua tau ma' tanopi idedewei deina uvihahaie. Iuna avaha kanamanei tau habuhabui Yaubada ya veimea itana-bwegebwegei. Ika, inua-tania, ka ivitupu, ka ivainau, ka kadu yaubada vitupu wayahia iaiwaodu. Aituhu tau ma' tanopi habuhabui uvihahaiei, nau-wawanimi tanopi taina uni-tawanei, e mani tanopi uvaniahei.

11 Ka yami leta taina nihenina ami veimea avenevenemi tau ekalesia wayahi. Iuna tau ekalesia tupwai vivane tau kenekenene, ka tupwai inua-tania, ka tupwai yaubada vitupu wayahia iaiwaodu, ka tupwai tomotau ahiahi imana-giboei, ka tupwai daudau bagibagina inim-kavokavovo ivi-kwavakwava, ka tupwai ivitupu, e mani tomotau yai kina ivainau deina. Ataina aveimeyemi eha tau ekalesia vitupu nui uvi-yaiane, kadu eha nui un'-am.*

12 Ka yauke yau pai veimea vivane tau ekalesia ai noe wayahia. Ka eha tomotau ekalesia up-

* 5:8: VV 16:3. a 5:9: Leta-nana Paulo tomani baina vivane leta-nana nonova maiova, ka eha wayahikaia ataina. * 5:11: 2Te 3:6; Tit 3:10.

una imamaei anau-yanahi. Ka vona ahiahina, itomi tau ekalesia nau-wawanimi taumi kadu una-nau-yanahimi tunuhina.

¹³ Apaina Yaubada tomotau ekalesia upuna imamaei na-nau-yanahi. Ka ataina Iginuma unuani, ivona,

“Avi onoto goyona, akanai uvitu-voi-onei yami nau-hohona wayahina”.

Wayahina, nau-wawanimi udedewei deina.✧

6

Itomi Tau Ekalesia Eha Uvi-kotukotumi

¹ Aituhu aitam tau ekalesia wayahimia enua-vita mani tau ekalesia wayahina, eha nau-wawanim am niam evi-kotu tau vaneneha gabemani^V mataia wayahia. Iuna tau vaneneha-naia eha tau ekalesia, wayahina tau eha Yaubada ya etawana it'-anamane. Ka Yaubada ya nuanua aituhu yam pai vona yavuha vin'-omo, akanai tauna ya tomotau vita-nana ivi-nua-dadani, e ami inua uvidoha deinake.

² Kaiwadi, avaha uanamanei o eha? Apaina, itoka Yaubada ya tomotau tau ma' tanopi habuhabui kanau-yanahi, ka kadu ai dewa-yaiyai kavi-nua-dadani. Wayahina, aituhu apaina paisewa ananina deinake ami pata, akanai tuta ataina itomi ami pata yami pai vona yavuha kikitui unau-yanahi, a?✧

³ Kaiwadi, avaha uanamanei o eha? Apaina wahuma nihenina kadu anelose kanau-yanahi,

✧ 5:13: VV 13:5; 17:7. ✧ 6:2: SiV 20:4.

ka kadu ai dewa-yaiyai kavi-nua-dadani. Wayahina, avi dewaia ivin'-omo tanopi taina wayahina eha aitam aviani ananina.

⁴ Wayahina, nau-wawanimi avi tau ekalesia ai wawa kikitui uvi-nua-dadanei, ka yai paisewa vivane avi tuta pai vona yavuha ivin'-omo ekalesia nihenina, akanai tau i na-nau-yanahi. Iuna aituhu aviyaivia ai wawa kikitui ekalesia nihenina, akanai tau avaha avi tomotau ekalesia upuna imamaei ianamane-tawanei.

⁵ Avonemi deina iuna yau nuanua ini-yauyau avenemi, uvaniahei. Kaiwadi, aitam koiaka wayahimia am pata pai vona yavuha tau ekalesia wayahi enononi, ena-nau-yanahi tunuhina, o eha? Avonemi, ika.

⁶ Kate ataina tuta yami dewa goyona, iuna uvi-kotukotumi tau i eha ita-vitumahane mataia.

⁷ Ia! Tutana yami dewa goyo-nana vaneana anononi, vivane uvi-kotukotumi, akaka anamanemi avaha uvito-paine upeu, udaudauva yawaimi Tau Ito-yavuha nihenina. Ka avi tuta tomotau idewa-goyomi, aituhu yai dewa uawaehei, kadu aituhu utoha-vi-anaimi, ka aituhu eha uvi-vonavona wayahina, akanai uvidoha deina. O avi tuta yami gugua ivainau, aituhu utoha-vi-anaimi, ka aituhu eha uvi-vonavona wayahina, akanai, uvidoha deina.

⁸ Kate ataina itomi yami dewa tunina. Ataina mani tau ekalesia yai gugua uvainau, kadu dewa goyona udedewei wayahia.

⁹ Vona ahiahina, tau goyogoyoi eha ai pata Yaubada ya pai veimea inuinu.

Kaiwadi, avaha uanamanei deina o

eha? Eha unonomi. Aituhu aviyaivia ikenekenene, o yaubada vitupu iawa-davedavei, o itavine-tamanei, o aituhu avi onoto kina iepepei ikenekenene, o avi onoto mani onoto nui ikenekenene, e Yaubada ya veimea itana-bwegebwegei deina,✧

¹⁰ o aituhu aviyaivia ivainau, o inua-tania, o daudau bagibagina inimnim ivi-kwavakwava, o aituhu aviyaivia mani tomotau iapa-goyogoyoei, o aituhu aviyaivia tomotau inonoi, e yai kina ivainau, eha aitam koiaka wayahia Yaubada ya pai veimea na-vaniahe.

¹¹ Ka nonova tupwami tau goyogoyomi deina. Kate Kauvea Iesu Tau Ito-yavuha a wavea uvitumahanei, kadu Yaubada tauna Nuana Ahihinata ya bagibagi vo-patami. Ka yawaimi nau-vunahi, kadu bou-keyemi tauna ya paisewa ana heta wayahina, kadu yaka Yaubada vo-vi-tunutunuhimi kadu apa-vidovidohemi matana.✧

Kenene Wayahina

¹² Tupwai ononotoi inuanua Yaubada ya veimea habuhabui avaha iakwa. Wayahina ivonavona, “Eha aitam dewa vito-potana wayahiai,” kate avonemi, dewa aitamoata aitamoata eha na-ivaitemi uvidoha. Taiu ivonavona, “Eha aitam dewa vito-potana wayahiai,” kate eha yau nuanua aitam dewa na-yohoni, e yawaiu na-veimeye.✧

✧ **6:9:** Gal 5:19-21; Epe 5:5; SiV 22:15. ✧ **6:11:** Tit 3:3-7. ✧ **6:12:** 1Ko 10:23.

13 Kadu aitam vona tomotau wayahia anononi, vivane vona baimina, ivonavona, “Aniani mamaei madika wayahi, kadu madika mamaei aniani wayahi,” kate avonemi, apaina Yaubada ainua na-vita-vovoni. Yaubada ininika veneka, kate eha ya nuanua wayahia kakenene. Tauna ya nuanua ininika kawaehei Kauvea wayahina, ka kadu Kauvea nau-wawani ininika veimeyei.✧

14 Ka Yaubada tauna ya bagibagi wayahina Kauvea anigea si-vi-mini-havinei, ka kadu apaina tauna ya bagibagi wayahina itoka anigea na-si-vi-mini-havineka aitamoata deina.✧

15 Ininika vivane Tau Ito-yavuha hutana. Kaiwadi, uanamanei o eha? Aituhu deina, eha nau-wawaniu Tau Ito-yavuha hutana awaehe tau kenekenene vavinena wayahina. Aioi, eha-ohota!✧

16 Aituhu aviyaivia tau kenene nui ikenekenene, akanai ainuai inini avaha ivi-aitamoata. Iginuma voneka tavine wayahina deina, ivona,

“Inini ainua ivo-vinei akanai ininina aitamoata.”

Kate avonemi iginumana an' anamana deina. Aituhu aviyaivia nui idaudauva, akanai inini ivi-aitamoata deina.✧

17 Ka aituhu aviyaivia Kauvea wayahina inau-tamoia, akanai tau nuai ka tauna nuana vivane aitamoata deinake.✧

18 Avi tuta kenene na-nau-dadanimi, itomi nau-wawanimi una-novo-tawanei. Dewa

✧ 6:13: 1Te 4:3-5. ✧ 6:14: Rom 8:11; 1Ko 15:20; 2Ko 4:14.

✧ 6:15: Epe 5:30. ✧ 6:16: Nao 2:24. ✧ 6:17: Ioni 17:21-23; Rom 8:9-11.

goyona habuhabui tomotau idedewei inini eha ivi-goyo, kate aituhu aviyaivia ikenekenene, dewana inini vi-goyoi.

¹⁹ Vona ahiahina, ininimi vivane Nuana Ahihinata ya Manua Vito-pota. Tauna nihenimia mamaei, iuna Yaubada awaehemi uvaniahei. Kaiwadi, avaha uanamanei, o eha? Aituhu deina, itomi ami heta eha nau-wawanimi yawaimi uveimeye, iuna Kauvea nau-wawani yawaimi veimeyei.

²⁰ Iuna tauna patana ananina wayahina vi-maiemi ya tomotau. Wayahina, nau-wawanimi ininimi wayahia Yaubada ana wawa uvo-vi-natei.✧

7

Me Korinita Yai Vi-tanai Tavine Wayahina

¹ Vonaia iakwa. Wayahina, ataina yami vi-tanai wayahiua yau leta nihenina avona-nau-patai. Vi-tanai-naia vivane tavine wayahina. Ka aituhu avi ononotoi eha itavine, akanai, tau ividoha deina.

² Kate dewana vitana, iuna tuta tuta tomotau habuhabui ikenekenene. Wayahina, onoto aitamoata aitamoata nau-wawani na-tavine, ka awana nui imamaei. Kadu deina, vavine aitamoata aitamoata nau-wawani na-tavine, ka awana nui imamaei. Ka aituhu avi tuta Satana na-nau-dadanimi, akanai awawami imamaei. Wayahina, eha aitam iuna udewa-goyona kenene wayahina.

✧ **6:20:** 1Ko 7:23; 1Pi 1:18-19.

³ Ka avi tuta onoto vavine ainua iawaeha itavine, akanai ainua iawaeha awana ya dewa-haiawa wayahina ina-ivaitei. Wayahina, onotomi nau-wawanimi yami vavine ai ayaunena uvo-vi-tunuhi, kadu vaivinemi nau-wawanimi yami onoto ai ayaunena uvo-vi-tunuhi.

⁴ Vaivinemi unononi. Aituhu avaha utavine, akanai ininimi a tau veimea eha itomi, kate ataina yami onoto ininimi iveimeyei. Kadu deinake onotomi wayahimi. Ataina ininimi a tau veimea vivane yami vavine, eha itomi.

⁵ Eha ami inua ininimi uvihahaie. Aituhu ami inua yami nuanua uviama Yaubada wayahina, akanai ana pata un'-awaehei aitamoata ininimi uvihahaiei auyewa aitonuata wayahia. Kate eha tuta bana mamanaina wayahina uneine deina. Ka nau-wawanimi umavi-havine tavine a venavenau ahiahina wayahina. Aituhu tuta bana mamanaina wayahina uvihahaiemi, e Satana vin'-omo na-nau-dadanimi, ukenene. Iuna tauna avaha anamanemi eha memeanina wayahimi utoha-vi-anaimi.

⁶ Vonaia tavine wayahina eha ami veimea Kauvea wayahina o kadi yauke wayahiua. Kate yauke taua au heta awaehemi deina.

⁷ Vona ahiahina, yau nuanua ananina habuhabumi wayahimi vivane yawaimi yawaiu deina. Yauke eha ata-tavine. Kate avaha anamanei Yaubada tomotau aitamoata aitamoata wayahikaia am-venena-kavovo veneveneka. Ka aitam wayahikaia an' am-venena-kavovo na-tavine ka dewa-haiawa. Ka kadu aitam wayahikaia an' am-venena-kavovo tunina.

Tauna siwasiwaboina mamaei ka dewa-haiawa deina.

⁸ Vonaia taina avonavona itomi tubuao kadu itomi ahahaba wayahimia, kadue itomi sibasibaua kadu itomi wadawadae wayahimia. Yauke taua anuanua aituhu uma'-keakeami, yauke deina, uvidoha.

⁹ Ka aituhu eha ami pata utoha-vi-anaimi ahiahina, akanai nau-wawanimi utavine. Iuna aituhu tuta tuta nuanuami bagibagi ininimi nihenina unuanua wayahina, dewana dewa goyona. Akanai, tavine dewa goyo-nana vane-tawanei.✧

¹⁰ Ka itomi tau tavine wayahimia, ami veimea taina Kauvea wayahina vin'-omo, eha yauke wayahiua. Itomi vaivinemi nau-wawanimi yami onoto nui umamaei. Eha uvaiobu, uni-tawane.✧

¹¹ Ka aituhu avi vaivine yai onoto ini-tawanei, akanai yai etawana ainua mamaei. Vaivinei nau-wawani ima'-keakeai, o nau-wawani yai onoto wayahia imavi-havine. Ai veimea mamaei, vivane eha ai pata itavine-havine. Kadu onoto ai veimea aitamoata deina. Eha yai vavine ivaibue.

Tau Tavitavine Awawai Nui Inini Aitamoata

¹² Ka aituhu aviyaivia wayahimia vita tuna tavine wayahina uvaniahei, eha aitam vona o kadi veimea Kauvea wayahina ata-vaniahe. Ka yau nuanua habuhabumi wayahimi deina. Aituhu avi tau ekalesia onotona tau tavine, ka aituhu ya vavine eha aitam tau ekalesia, kate

✧ **7:9:** 1Ti 5:14. ✧ **7:10:** Mat 5:32.

aituhu ya vavine yai nuanua nui imamaei, akanai onoto-nana nau-wawani eha vaiobue.

¹³ Kadu deina, aituhu avi tau ekalesia vavina tau tavine, ka aituhu yai onoto eha aitam tau ekalesia, kate aituhu tauna ya nuanua nui imamaei, akanai vavine-nana nau-wawani eha ivaiohue. Avonemi deina, ka iuna ananina mamaei vonana wayahina.

¹⁴ Aituhu tau tavine eha yai vitumahana, kate aituhu awawai Yaubada ivitumahanei, akanai Yaubada avaha tau eha yai vitumahana awaehei ahihiata matana. Yaubada dewei deina iuna tau tavine ainua vivane tomotau aitamoata tauna matana. Aituhu eha deina, tau natunatui imamae goyogoyoi Yaubada matana. Ka ataina avonemi, Yaubada avaha natunatui awaehei ahihiata matana.

¹⁵ Kate aituhu tau tavine eha yai vitumahana yai nuanua awawai ivaiohuei, ini-tawanei, akanai avonemi, awawai ai pata vaiobu-nana iawaehei iyavuhi ini-tawanei. Eha aitam veimea ta-mamae vaiobu-nana deina ivihahaie. Iuna Yaubada honehoneka nua gomagomanina nihenina kamamaei. Eha ya nuanua kavi-naua.✧

¹⁶ Kate anau-vi-avinimi, mai-nuami vaiobu un'-awaehei. Iuna eha tuta tepakaia un'-anamane-vidoha. Wamike tau tavinemi medeina? Kaiwadi, apaina yami onoto ito-yavuha vaniahe iuna wamike una-ivaitei, a? O kadi wamke tau tavinem medeina? Apaina yam vavine ito-yavuha ivaniahe iuna taum ena-ivaitei, a?✧

Kadu Aitam Me Korinita Yai Vi-tanai

✧ 7:15: Rom 14:19. ✧ 7:16: 1Pi 3:1.

17 Yaubada avaha honemi uvitumahanei, ka tutana honemi, itomi yawaimi tunina tunina. Ka aitamoata aitamoata wayahimia nau-wawanimi medeina tuta-nana umamaei, akanai, ataina umamaei deina. Veimea taina yau veimea ekalesia aitamoata aitamoata nihenina, ka veimea taina aviwavenei papani habuhabui wayahia deinake.

18 Wayahina, aituhu aitam onoto yana idaba mamaei, ka aituhu munia tauna Yaubada ya vi-hone nononi vi-tau vitumahana, akanai onoto-nana eha nau-wawani yana idaba na-vo-vine. Kadu deina, aituhu aitam onoto eha yana idaba, ka aituhu munia tauna Yaubada ya vi-hone nononi vi-tau vitumahana, akanai tauna eha nau-wawani yana idaba n'-awaeha.

19 Aituhu aviyaivia yai idaba imamaei, dewana eha aitam aviani. Ka aituhu aviyaivia eha yai idaba ita-mamae, dewana kadu eha aitam aviani. Aituhu aviyaivia ai veimea Yaubada wayahina ivi-ateteyei, akanai, dewana dewa ananina Yaubada matana.*

20 Wayahina, aitamoata aitamoata wayahimia nau-wawanimi medeina umamaei tutana Yaubada honemi, akanai ataina umamaei deina.

Eha yami ma' wayahina o yami paisewa tanopi taina wayahina unua-vita.

21 Kaiwadi, aituhu koiaka wamke tau paisewa-kavokavovo tutana Yaubada honem, dewana eha aitam aviani. Kate apaina, aituhu yam auyewa ahiahina vin'-omo, ka aituhu am tau veimea n'-awaeha na-yavuhim, akanai deina, avaha evidoha.

* 7:19: Rom 2:25; Gal 5:6; 6:15.

²² Vona ahiahina, aituhu koiaka wamke tau paisewa-kavokavovo tanopia, ka aituhu munia Tau Ito-yavuha honem, taum vivane Tau Ito-yavuha ya tomotau, ka tauna avaha nuam yavuhi. Kadu deinake, aituhu koiaka wamke eha tau paisewa-kavokavovo tanopia, ka aituhu munia Tau Ito-yavuha honem, taum avaha evi-tau paisewa-kavokavovo tauna wayahina.✧

²³ Iuna Yaubada avaha habuhabumi vi-maiemi patana ananina wayahina. Wayahina, eha nau-wawanimi uvi-tau paisewa-kavokavovo tomotau wayahia.

²⁴ Yaiau, avona-havinemi, aitamoata aitamoata wayahimia nau-wawanimi medeina umamaei tutana Yaubada honemi, akanai ataina umamaei deina.

Yami vi-tanai-naia avaha avona-nau-patai iakwa deina.

Mani Vi-tanai Tavine Wayahia

²⁵ Vona taina vivane ahahaba mata-yauyoi wayahi. Kauvea eha aitam veimea ta-veneu ahahaba mata-yauyoi wayahi. Kate Yaubada ate-nuanuai veneu, ka paisewa ananina veneu, iuna tauna vitumahaneu. Wayahina, itomi kadu ami pata uvitumahaneu.

²⁶ Ataina tuta vivane tuta vita-vainena. Wayahina, anuanua aituhu uma^l-keami, uvidoha deina.

²⁷ Aituhu koiaka wamke avaha etavine, eha nau-wawanim edewa-dadani vaiobu evaniahe. Ka aituhu koiaka wamke eha eta-tavine, eha nau-wawanim awam wayahina enaunau-nene.

✧ 7:22: Pile 16; 1Pi 2:16.

²⁸ Kate aituhu aviyaivia apaina itavine, dewana eha dewa goyona wayahi. Kadu deina, apaina aituhu avi ahahabai itavine, dewa taina eha dewa goyona. Ka unuani. Tau tavitavine vitai habuhabui yawai taina nihenina ivaniahei, ka yau nuanua wayahimi yawaimi avo-vi-meani.

²⁹ Yaiiau, yau vonana a pai mini ananina taina. Yaka tuta tanopi taina wayahina vivane kutakutana. Wayahina, tau tavitavine nau-wawani inuanua Yaubada ya nuanua wayahia, tau eha ita-tavine aitamoata deina.

³⁰ Kadu tau vi-mohai nau-wawani inuanua tau i dewa-haiawa aitamoata deina. Kadu tau i dewa-haiawa nau-wawani inuanua tau i nua-vita aitamoata deina. Kadu tau i gugua ivi-maiei nau-wawani inuanua tau payapayaya aitamoata deina.

³¹ Ka kadu tau i tanopi taina a gugua wayahia ipaipaisewa nau-wawani inuanua gugua-naia eha aitam aviani mataia deina. Iuna tuta tepakaia wayahina, tanopi taina an' auyewa pai nau-yehata omomo.✧

³² Wayahina, yauke yau nuanua wayahimi vivane eha tanopi taina ana dewa wayahi unuanua toyoina. Iuna aituhu avi ononotoi eha ita-tavine, tau i ai pata Kauvea ana heta ya paisewa wayahina inuanua, kadu ai pata Kauvea ya nuanua wayahina inuanua medeina tauna ivo-vi-dewa-haiawi.

³³ Kate tau tavitavine ononotoi yawai taina a venavenau wayahina inuanua ananina. Ka tuta tuta awawai yai nuanua wayahia inuanua medeina yai vavine ivo-vi-dewa-haiawi.

✧ 7:31: 1Io 2:17.

³⁴ Wayahina, tau tavitavine ononotoi yai nuanua tana-vewanina mamaei, vivane ainua. Kadu vaivine wayahi deinake. Aituhu avi vaivine eha awawai o aituhu avi ahahabai, tau ai pata Kauvea ana heta ya paisewa wayahina inuanua ananina. Tau ai pata ivi-nua-dadani inini kadu nuai ainua iawaehei Kauvea wayahina, vivane tauna na-veimeyei. Kate tau tavitavine vaivine tanopi taina ana dewa wayahina inuanua. Ka tuta tuta awawai yai nuanua wayahia inuanua medeina yai onoto ivo-vi-dewa-haiawi.

³⁵ Yaiau, vonana avonavona itomi yami vidoha wayahina. Eha yau nuanua avito-potami, kate yau nuanua ami pata etawana aitamoata uvi-munie, vivane Kauvea ana heta ya paisewa upaipaisewei.

³⁶ Ka aituhu koiaka wamke avaha aitam ahabana nui uawaehei utavine, kadu ataina aituhu tavinena ekweui enua-vita wayahina (iuna ahabanana avaha ai ponimana habuhabui vaniahei), ka aituhu enuanua nau-wawanim utavine, akanai, yam nuanua deina edewei, ka ami inua utavine. Dewana eha aitam dewa goyona.

³⁷ Kate aituhu koiaka wamke avaha am pata nua gomagomanina nui nuanuam ininim wayahina eveimeyei, ka avaha evi-nua-dadani ahabana mata-yauyona evihahaiei eha etavine, akanai wamke kadu dewa ahiahina ededewei.

³⁸ Wayahina, aituhu aviyaivia ahahabai mata-yauyoi itavinei, dewa ahiahina idedewei, ka ononotoi ividoha deina. Kadue aituhu aviyaivia ahahabai mata-yauyoi ivihahaiei, ononotoi ividoha-tawanei.

³⁹ Tau tavitavine vaivine ai veimea mamaei.

Vavinem, nau-wawanim yam onoto nui umamaei a itoava tauna yawaina na-iakwa wayahina. Ka aituhu yam onoto inusi, akanai eha aitam veimea ta-mamae yam tavine-havine vito-pote. Wamke am pata koiaka yam nuanua etavine, akanai etavine. Ka veimea aitamoata yam tavine vovouna veimeyei, vivane onotona nau-wawani tau ekalesia.✧

⁴⁰ Kate yauke anuanua aituhu wadawadaei imamaei, ividoha deina. Kadu anuanua yauke Nuana Ahihinata ama inua awaehi aitamoata vonana wayahina.

8

Tau Ekalesia Nau-wawanika Katoha-vi-anaika

¹ Kadu aitam yami vi-tanai yau leta nihenina, vivane aniani wayahina. Tai eha tau ekalesia yai dewa vahitau ivi-nomui yaubada vitupu wayahia, e munia vahitau-naia manua tapanono-naia nihenia imwaneyei. Ka yami nuanua yauke avi-nua-dadani, avonemi kadi vahitau-naia vito-potana wayahimia, o kadi awaehemi akanai uvi-maiei, un'-ania. Wayahina naona avonemi deina. Avaha uanamanei nua-uya habuhabuka wayahikaia mamaei. Ka nua-uya wayahina nua-vane vin'-omo, kate tomotau ividoha dewa-vidovidoha wayahina.✧

² Aituhu aviyaivia inuanua avaha nua-uya wayahia mamaei, tai eha it'-anamane-vidoha. Iuna tai nau-wawani in'-anamanei nua-uya habuhabuna eha wayahia.✧

✧ 7:39: Rom 7:2-3. ✧ 8:1: Dew 15:29. ✧ 8:2: Gal 6:3.

3 Kate aituhu aviyaivia Yaubada idewa-vidovidohei, akanai Yaubada kadu tau anamanei.

4 Wayahina, medeina kana-vona anini-naia tomotau iam-venena yai itupwana wayahia. Avaha kanamanei itupwana eha aitam aviani, kadu yai bagibagi eha, iuna yaubada tunina tunina eha ita-mamae, kate Yaubada aitamoata-hoina mamaei.✧

5 Tomotau habuhabui inuanua yaubada habuhabui imamaei, tupwai wahuma, kadue tupwai tanopia (ka vona ahiahina, tomotau ivi-wahani “yaubada” o “kauvea”).

6 Kate itoka wayahika Yaubada aitamoaata-hoina mamaei. Ka tauna vivane Amaka, kadu tauna a heta-ohota dewa habuhabui vevewanei, kadu itoka yawaika kawaehei, e ya nuanua kadedewei. Kadue kavitumahanei yaka Kauvea aitamoata, ka tauna Iesu Tau Ito-yavuha a heta-ohota, ka tauna vivane etawana dewa habuhabuna wayahina ivin'-omo. Kadu tauna wayahina itoka yawai-vavaha kavaniahei.✧

7 Itoka yaka vitumahana toyoina, kate tupwai tau ekalesia yai vitumahana ihanuana. Iuna inua-tupatupa itupwana nuai imamaei. Wayahina, avi tuta tomotau-naia itupwana ai ma' ianiana, munia imatamatauta, iuna tomotau-naia ai ayaunena ihanuai. Wayahina, avaha iania iakwa, ai ayaunena ivi-goyogoyoi deina.

8 Ka vona taina unua-vi-avini. Aniani eha yaka etawana vivane Yaubada dewa-vidovidoheka. Aituhu vahitau-naia kaniana, eha ana

✧ 8:4: Gal 4:8; VV 4:39; 6:4. ✧ 8:6: Epe 4:5-6.

pata kavidoha Yaubada matana. O aituhu vahitau-naia kavihahaiei, dewana eha yawaika vi-goyo Yaubada matana.

⁹ Ataina itomi bagibagimi anau-vi-avinimi itomi udune-vivinimi. Iuna avi dewa uawaehei udedewei, munia aituhu aviyaivia nuai ihanuai yami dewaia idudueyei, ka aituhu apaina dewaia idewa-dadani idewei, yami dewaia avaha vi-pai vito-paine wayahia. Iuna tau nuai apa-goyogoyoei dewana wayahina.✧

¹⁰ Iuna aituhu tau ai ayaunena ihanuai avaha idueyemi vahitau-naia uamam yaubada vitupu yai manua tapanono nihenia, munia ibagibagi, idewa-dadani vahitau-naia in'-ania deina. Kate avaha iam iakwa, akanai tau ai ayaunena ivonevonei avaha dewa goyona idewei deina.

¹¹ Wayahina, kana-vona tomotaui yawai igoyo, ka iuna itomi yami dewaia. Tau Ito-yavuha kadue aniga tomotau ai ayaunena ihanuai wayahi, kate itomi yami nua-uya avaha yaiami yawai vita-vovoni.✧

¹² Aituhu udedewei deina, ka munia aituhu vavaneimi-naia ai ayaunena ihanuai ipeupeu, akanai itomi Tau Ito-yavuha udewa-goyoei deina.

¹³ Wayahina, aituhu yauke au vahitau wayahina vaneiu yawaina avi-peui, akanai nau-wawaniu vahitau-nana avito-potau, eha an'-ania. Iuna eha yau nuanua vaneiu yawaina avi-goyoi.

Wayahina, nau-wawanika vavaneika kadewa-vidovidohei. Ka aituhu aitam yaka

✧ **8:9:** Rom 14:13-15; Gal 5:13. ✧ **8:11:** Rom 14:15, 20.

dewa eha vito-potana wayahikaia, kate aituhu dewana vavaneika yawai vi-goyoi, aituhu dewana kaboui, katoha-vi-anaika, akanai yaka dewa-vidovidoha kaviwavenei deina.✠

9

Paulo Ya Pai Dune Toha-vi-anai Wayahina

¹ Wayahina, itomi nau-wawanimi yau pai dune toha-vi-anai wayahina uvi-munie. Kaiwadi, aviani unuanua taua wayahiu? Yauke tau hae ananiu aitam, o eha? Kaiwadi, aitam veimea mamae vito-potau? Eha. Avaha uanamaneu yauke taua koiaka. Yauke Kauvea Iesu Tau Ito-yavuha a tau hae ananiu aitam, ka mataua avaha Kauvea adueyei. Ka ataina itomi avaha Iesu uvitumahanei ka uvi-tau ekalesia, iuna yau paisewa Kauvea wayahina.✠

² Aituhu mani tomotau au wava tau hae wayahina imana-giboei, itomi eha ami pata au wava umana-giboei deina. Iuna itomi Kauvea uvitumahanei yau nau-wahe wayahina! Akaka kadueyei yauke taua tau hae-hoiu.✠

³ Ka avi tuta tomotau yai nuanua yau dewaia inau-yanahi, akanai itomi yami ekalesia atomani, e igenuana. Ika, itomi yami dewa ahiahina vivane yau ipupu-tana-pota au havia wayahi.

⁴ Akanai, amavi-havine yau pai dune wayahina. Unuanua. Medeina Yaubada ya nuanua itoai tau hae wayahiai? Aviani Kauvea voneyei? Vona ahiahina, tauna ama ma' kadu

✠ **8:13:** Rom 14:21. ✠ **9:1:** Dew 22:17-18; 26:16; 1Ko 15:8-9.

✠ **9:2:** 2Ko 3:2-3.

ama nim awaeheai, ka ya nuanua uveneveneai
ama nau-pata yama paisewa wayahina.✧

⁵ O medeina unuanua tavine wayahiu? Aituhu
yau nuanua tau vitumahana vavinena atavine, e
nui ani-awana, dewana medeina? Ika, au pata,
ka mani tau hae idedewei deina, ka Kauvea va-
vanei kadu KepasiV idedewei deina. Au awaeha
mamaei, kate eha yau nuanua adedewe deina.

⁶ O medeina unuanua paisewa wayahina?
Kaiwadi, yauke Banabasi ama inua ama heta
nau-wawaniai apaipaisewa ama ma' wayahina,
ka mani tau hae eha? Eha. Ama inua kadue ama
pata ama ma' avaniahei, mani tau hae ivaniahei
aitamoata deina.

⁷ Ka itomi nau-wawanimi ugenuana ka un-
uanua kikituna wayahina. Avi tau nau-havia
ana heta a nau-pata venevenei? Eha aitam. O
kaiwadi, avi tau baguna wainaV uana manawana
bagubaguni, kate eha uana epepe? Eha aitam. O
kadi avi tau dune-vi-avina sipiV dune-vi-avini,
kate nunu wayahia eha nimmim? Eha aitam.

⁸ Medeina? Yau vonana vivane tau ma' tanopi
yai vona deina? Eha. Yaubada ya veimea voneka
aitamoata deina.

⁹ Iuna Mosese ya veimea nihenina iginuma
taina mamaei, ivona,

“Avi tuta vahitau okisiV ipaipaisewa
baguna witiV nihenina,
eha nau-wawanimi awai ubou-potepote,
kate nau-wawanimi
uawaehei witiV tupwana iamam.”

✧ 9:4: Luk 10:8.

Iginumana nihenina Yaubada eha ta-nuanua toy-
oina okisiV wayahia.✧

10 Ka iginumana a pai mini ananina vivane to-
motau wayahika. Iuna tau paisewa nau-wawani
ai nau-pata ivaniahei yai paisewa wayahina.
Udu. Avi tuta tau baguna waipei ibagubaguna, o
avi tuta tau ponuponu uana iponuponui, aituhi
avaha ianamanei ai nau-pata potapotai, akanai
anamanana yai paisewa vo-vi-meani.✧

11 Ka itoi tau hae avaha waipei abaguba-
guni itomi nuami nihenina deina. Wayahina,
nau-wawaniai ama nau-pata avaniahei itomi
yami gugua tupwai wayahia.✧

12 Itomi avaha tupwai tomotau uaivaitei yami
gugua wayahia deina. Kate udu. Aituhi tau
ai wava kikitui nau-wawani yami gugua ivani-
ahei ai nau-pata yai paisewa wayahina, akanai,
yauke tau hae au wava ananina nau-wawaniu
yami gugua avaniahe deinake. Kate eha aitam
tuta ivaita wayahimia ata-vaniahe. Eha. Tuta
tuta nau-patana avihahaiei. Iuna yau nuanua
Tau Ito-yavuha Vaneana Ahiahina a venavenau
aivaitei, ka eha yau nuanua vaneana a ve-
navenau abou-pote. Wayahina, avi-nua-dadani
atoha-vi-anaiu akanai.✧

13 Avi tau paisewa ipaipaisewa Manua
Vito-potana nihenina ai ma' ivaniahei aninina
wayahina. Kadu deina, tau ipaipaisewa
pai vi-nomu wayahina, ai vo-pata ivaniahei
vahitau-naia tomotau iomaomanei yai vi-nomu

✧ 9:9: VV 25:4; 1Ti 5:18. ✧ 9:10: 2Ti 2:6. ✧ 9:11: Rom 15:27.

✧ 9:12: Dew 20:34; 2Ko 11:9.

wayahia.✠

14 Kadu Yaubada avaha veimeyeka aituhu aviyaivia Vaneana Ahiahina inaunau-wahe, tau nau-wawani ai ma' ivaniahei paisewana wayahina deina.✠

15 Yaubada awahehu deina, kate eha aitam tuta veimeana ata-tomani wayahimia. Ka ataina eha yau nuanua uvi-putu una-ivaiteu. Eha. Yau nuanua ananina au pata avona-vanevane yau toha-vi-anai wayahina. Aituhu aviyaivia yai nuanua yai gugua ivo-patau, yau vona-vanevanena ibou-potei deina, yau nuanua naona an'-aniga. Aituhu an'-aniga, eha ai pata yau vona-vanevane ibou-pote.

16 Ka avi tuta Vaneana Ahiahina anau-nau-waheyei, eha au pata dewana wayahina avona-vanevane. Iuna au veimea Yaubada wayahina mamaei anaunau-wahe. Ika, aituhu eha Vaneana Ahiahina anau-wahe, au dewa-yaiyai potapotau!✠

17 Aituhu au pata avi-nua-dadana anau-wahe, akanai au nau-pata avaniahe wayahimia. Aituhu eha yau nuanua anau-wahe, yau nuanua eha aitam aviani. Iuna, Yaubada avaha paisewana veneu, wayahina nau-wawaniu adedewei.

18 Wayahina, au nau-pata aviani? Vona ahiahina, dewa taina ana heta, vivane avi tuta Vaneana Ahiahina anaunau-waheyei, yau nuanua awawaehina tomotau anaunau-wahei. Wayahina, aituhu tau vanenehai yai nuanua iaivaiteu kina wayahina, avihahaiei. Ka munia kan'-anamanei awawaehina ivaniahei

✠ 9:13: VV 18:1-3. ✠ 9:14: Mat 10:10; Gal 6:6. ✠ 9:16: Ier 20:9.

wayahiua.

Paulo Yana Dewa Vo-vinei, E Tomotau Na-ivaitei Deina

¹⁹ Yauke taua au heta avi-nua-dadani avi-tau paisewa-kavokavovo tomotau habuhabui wayahi. Ka aituhu au pata ana-ivaitei Iesu ivitumahanei deina, adewa-haiawa. Akanai, eha aitam veimea wahuma o tanopia ta-veimeyeu adedewei deina.

²⁰ Wayahina, avi tuta me Iudea nui amamaei, akanai yau dewa avo-vinei yai dewa aita-moata deina. Iuna yau nuanua ana-ivaitei Iesu ivitumahanei. O avi tuta tau Mosese ya veimea ivi-ateteyei nui amamaei, akanai veimeai avi-munie. Iuna yau nuanua tau aivaitei Iesu ivitumahanei. (Avi tuta tau nui amamaei adedewei deina, kate ataina Mosese ya veimea eha yawaiu veimeye.)[☆]

²¹ Ka avi tuta tau eha Mosese ya veimea it'-anamane nui amamaei, akanai yau dewa avo-vinei yai dewa aitamoata deina, vivane Mosese ya veimea upuna wayahina. Iuna yau nuanua aivaitei Iesu ivitumahanei. (Ataina Mosese ya veimea eha yawaiu veimeye, kate tuta tuta Yaubada yau dewa veimeyei, kadue Tau Ito-yavuha ya veimea veimeyeu.)

²² Ka avi tuta tomotau ihanuai nui amamaei, yau dewa avo-vinei yai dewa aitamoata deina. Iuna yau nuanua aivaitei Iesu ivitumahanei. Udueyei. Yau dewa deina. Tomotau yai dewa tunina tunina imamaei. Ka avi tuta tomotau nui amamaei, yau dewa avo-vinei tau yai dewa

[☆] 9:20: Dew 21:20-26.

aitamoata deina. Iuna yau nuanua ananina aivaitei Iesu ivitumahanei. Wayahina, etawana tunina tunina wayahina adewa-dadani aivaitei Iesu ivitumahanei.✧

²³ Yau dewa deina iuna yau nuanua ananina Vaneana Ahiahina a etawana avo-vi-meani, kadu yau nuanua avi nau-iaiaiva ivin'-omo Vaneana Ahiahina a nau-wahe wayahina, nau-iaiaiva avaniahei.

²⁴ Avi tuta tomotau inau-bwanunua nau-pata wayahina, akanai yoko habuhabui inau-bwanunua, kate na-iakwa tauna ana heta wayahia eta-naoi nau-patana vaniahei. Avaha uanamanei, o eha? Wayahina, avo-vi-vatumi unau-bwanunua ahiahina, tau i yai nuanua ananina ieta-naoi deina.

²⁵ Aituhu aviyaivia yai nuanua inau-hohona iviam-wanene dewa ani-vainena wayahina^a, tau nau-wawani mani dewa ivihahaiei, e tuta bana mamanaina wayahina dewa aitamoata idewa-nubunubui. Tau idedewei deina iuna yai nuanua nau-pata kunu-nabanaba ivaniahei. Ka kunu-nabanabai inau-moewa-kwayavoni. Baina tanopia ina-iakwa. Kate itoka tau ekalesia yawaika kaveimeyei, iuna yaka nuanua nau-pata-vavaha kavaniahei.✧

²⁶ Wayahina, yauke eha ata-nau-bwanunua-kavokavovo, aitam tau nau-bwanunua mwagemwagena deina. Ka eha ata-vi-naua-kavokavovo, aitam tau vi-naua goyona tutu-haini deina.

²⁷ Eha. Yauke yau dewa vivane

✧ **9:22:** 2Ko 11:29. **a 9:25:** Tomotau iviam-wanene *Olimpika Gem* deina. (Edu *Olimpika Gem Vona nihenina*.) ✧ **9:25:** Pili 3:14; 2Ti 4:7-8; 2:4-5.

ininiu aveimeyei toyoina, vivane yau tau paisewa-kavokavovo deina. Adedewei deina iuna eha yau nuanua ataina mani tomotau anau-wahei, kate munia, Yaubada vito-potau au nau-pata atutu-haini.✧

10

Paulo Nau-vi-avini Dewa Goyona Wayahina

¹ Vavaneiu, yau nuanua itoka yaka tupua-nenenehi unuani. Iuna tau i eha yawai ita-veimeye tunuhina, ka yai dewa goyo-nana vivane pai dune wayahikaia. Tuta nonova wayahina, tutana habuhabui Mosese ivi-munie, aitam you mamaei hetaia, kadu habuhabui Hawana Yabebenina nihenina aeia iona-tamane i mani papania.✧

² Dewaia ainua anani wayahia, vivane you-nana kadu hawanana, tau ai bapitaiso ivaniahei deina, e tuta tanoi wayahina tau ivi-tau vi-muni Mosese wayahina deina.

³⁻⁴ Ka tau habuhabui ai ma' aitamoata nuai wayahi iania, kadue habuhabui ai daudau aitamoata nuai wayahi inimnim. Ka daudau-nana taitaina aitam hanu wayahina, vivane Tau Ito-yavuha wayahina, iuna tauna nui ivenavenau. Ka tauna dewa-bagibagi-vainei habuhabui wayahi dedewei, idudueyei deina.✧

⁵ Kate dewa-bagibagi-vaine-naia wayahi nuai ipani, kadu yai dewa eha tunuhina Yaubada matana, ka tauna eha ta-dewa-haiawa tomotau

✧ **9:27:** Rom 8:13; 13:14. ✧ **10:1:** NiT 13:21-22; 14:22-29.

✧ **10:3-4:** NiT 16:35; NiT 17:6; Yau 20:11.

wayahi. Wayahina, habuhabui ianiga, ka tau mate-naia ipeupeu papani tunina tunina anata nihenina.✧

Me Isiraeli Yai Dewa Vivane Pai Dune Goyogoyoi

⁶ Ka dewa-yaiyai-nana ivaniahei deina vivane pai dune ananina wayahikaia, ka nau-vi-avinika. Tai yai nuanua ananina dewa goyona. Wayahina, kadueyei nau-wawanika dewa goyo-naia kavihahaiei.✧

⁷ Tupwai wayahia yaubada vitupu wayahia iaiwaodu. Wayahina, kadueyei nau-wawanika yaubada vitupu kavihahaiei.

Ka Iginuma voneka, ivona,

“Tomotaui imanuenta iamam, inimnim.

Iakwa, e itavotavona, inim-kavokavovo,
ka kadu ikenekenene.”✧

⁸ Ka munia, ai dewa-yaiyai Yaubada wayahina ivaniahei, vivane auyewa aitamoata nihenina tau wayahia ai yau 23,000 ipeu, ianiga. Wayahina, kadueyei nau-wawanika kenene kavihahaiei.✧

⁹ Kadu tupwai wayahia Yaubada inau-dadani, ka munia ai dewa-yaiyai ivaniahei, vivane mwata honahonai ihovahovai ianianiga. Wayahina, kadueyei eha nau-wawanika Kauvea kanau-dadani.✧

¹⁰ Kadu tupwai wayahia Yaubada inau-vonuvonuei. Ka munia, Yaubada tauna

✧ **10:5:** Yau 14:29-30. ✧ **10:6:** 1Ko 10:11; Yau 11:4, 34. ✧ **10:7:** NiT 32:6. ✧ **10:8:** Yau 25:1-9. ✧ **10:9:** Yau 21:5-6.

Aniga An' Anelose vi-tunei omo wayahia, ka anelose-nana vita-vovoni. Wayahina, kadueyei eha nau-wawanika kanau-vonuvonu.✧

¹¹ Dewa-yaiyai-naia habuhabui ivin'-omo me Isiraeli yama tupua-nenenehi wayahia, ka dewaia vivane pai dune mani tomotau wayahi, kadu Mosese dewaia habuhabui ginumi (ka Iginuma nihenina imamaei) vivane nau-vi-avina ananina wayahikaia. Itoka tau ekalesia katupua tuta pai nau-yehata wayahina, ka tuta eha ani-hoina na-iakwa, Yaubada ya vevewana habuhabuna na-iakwa. Wayahina, nau-wawanika pai dune-naia kanua-vi-avini.

¹² Aituhu aviyavia inuanua imimini toyoina, tau nau-wawani mai-nuai. Iuna memenanina habuhabuka wayahikaia goyona nihenina kapeupeu.

¹³ Udu. Pai nau-dadana habuhabui ivin'-omo-nananena wayahimia, ka tuta tuta mani tomotau habuhabui kadue nau-dadanaia aitamoata aitamoata ivaniahei Satana wayahina deina. Ka Yaubada ya vona-dabadaba mamaei aituhu itomi ihanuami ka eha ami pata, akanai tauna eha Satana n'-awaehe na-nau-dadanimi ani-vainena. Wayahina, aituhu yami nau-dadana mamaei, akanai, avaha kanamanei ami pata wayahina. Ka avi tuta yami nau-dadana ivin'-omo uvaniahei, Yaubada bagibagi venevenemi ami pata utoha-vi-anaimi a itoava ina-iakwa wayahina. Kadu tauna yami etawana vo-vi-aiaia, ka una-novo-tawanei.

¹⁴ Yaiiau, adune-nuanuaiemi. Wayahina, itomi nau-wawanimi yaubada vitupu uvihahaiei. Eha

✧ **10:10:** Yau 16:41-49.

una-iwaodu wayahia.

¹⁵ Yau vonana eha aipuipupu tomotau mwagemwagei wayahia. Kate avaha anamanemi itomi ami pata yau vonana unononi, un¹-anamanei vonaia tunuhina ana noe.

Tau Ekalesia Habuhabuka Iesu Ininina Aitamoata

¹⁶ Ka avi tuta Sakarameni wayahina kanau-hohona, vei-nana vivane aka nau-iaiava ana vei, ka Yaubada kanau-kaiwei wayahina. Ka avi tuta vei-nana wayahina kanimnim, nau-wawanika kanuani Tau Ito-yavuha dayahina itaina iopu wayahika, kadu ataina itoka tauna yawaina kavo-patei dayahina wayahina. Ka aitamoata deina, avi tuta palauana kagibui, kaniaia, nau-wawanika kanuani Tau Ito-yavuha ininina vi-nomui wayahika, kadu ataina itoka tauna yawaina kavo-patei ininina nihenina.✧

¹⁷ Itoka tau ekalesia habuhabuka, ka palauana aitamoata kaniaia. Wayahina, kadueyei itoka tauna ininina aitamoata.✧

¹⁸ Me Isiraeli yama dewa tutuaina unuani. Tauai yama tau vi-nomu vahitau ivi-nomui pai vi-nomu wayahina, ka dewa goyona a nau-pata inau-vevewanei deina. Munia aituhu aviyaivia wayahia vahitau-naia ianiaia, tau nau-iaiavana ivaniahei, vivane ai vo-pata.✧

¹⁹ Vona ahiahina, aituhu tomotau vahitau ivi-nomui yaubada vitupu wayahia, o aituhu ani-ani iam-venena mani pai vitumahana wayahia,

✧ **10:16:** Mat 26:26-28. ✧ **10:17:** Rom 12:5. ✧ **10:18:** Lev 7:6.

taui inuanua yaubadaia imamaei, kadu inuanua dewaia wayahia ividoha.✧

²⁰ Kate avonemi eha-ohota. Tomotauivi- nomu nua gawagawami wayahia, eha Yaubada wayahina. Ka eha yau nuanua nua gawagawami una-ivaite yai dewa goyona wayahia.✧

²¹ Eha nau-wawanimi Kauvea yana vei wayahina unimnim, kadu nua gawagawami yai vei wayahina unimnim. Ka eha ami pata Kauvea a pai nuana uania, kadu nua gawagawami ai pai nuana uania.✧

²² Aituhu kadedewei deina, apaina Kauvea vi-bwanou. Kaiwadi, itoka tauna kabagibagi-tawanei? Eha-ohota!✧

²³ Tupwami uvonavona, “Eha aitam dewa vito-potana wayahikaia. Ika, aviani yaka nu-anua, aka pata dewaia kadedewei deina.” Kate avonevonemi, dewa aitamoata aitamoata eha ahiahina wayahimi. Iuna dewa tupwai yawaimi ivi-goyogoyoi. Ka uvonavona, “Eha aitam dewa vito-potana wayahikaia. Ika, aviani yaka nu-anua, aka pata dewaia kadedewei deina.” Kate avonevonemi, mani tau ekalesia eha ividoha yami dewa aitamoata aitamoata wayahia.✧

²⁴ Eha aitam koiaka wayahimia nau-wawanim yam vidoha ana heta wayahina enuanua, kate habuhabumi nau-wawanimi vavaneimi kadu novunovumi wayahia unuanua, medeina una-ivaitei ividoha.✧

²⁵ Eha aitam veimea vahitau wayahina vito-potami. Wayahina, aituhu avi vahitau

✧ **10:19:** 1Ko 8:4. ✧ **10:20:** VV 32:17; SiV 9:20. ✧ **10:21:** 2Ko 6:15-16. ✧ **10:22:** VV 32:21. ✧ **10:23:** 1Ko 6:12. ✧ **10:24:** Rom 15:1-2.

uvaniahei maketia, akanai vahitau-naia uvi-maiei, un'-ania. Ka unononi. Eha tau aimwane uvi-tanatanaiei vahitau-naia deina, “Vahitau taina aveta baina wayahina vin'-omo? Kaiwadi, yaubada vitupu yai pai vi-nomu aitam, o medeina?” Eha itomi ai ayaunena wayahi uvi-tanatanaiei deina.

²⁶ Iuna, Iginuma voneka, ivona,

“Tanopi ka dewa habuhabuna tanopi nihenina vivane Yaubada ya vevewana, kadu tauna ya gugua.”☆

²⁷ Wayahina, aituhu tau eha tau ekalesia yai nuanua nui un'-am, ka aituhu yam nuanua eawaehei deina, akaka avi vahitau o avi aniani iven-evenem, aninina en'-ania, ka eha am ayaunena nihenina evi-tanatanaiei.

²⁸ Kate aituhu ivonem deina, “Aniani taina vivane pai vi-nomu aitam yaubada vitupu wayahina. Kaiwadi, aniani taina vito-potana wayahima, a?”, akanai aninina evihahaiei iuna nau-wawanim eawaehei aitamoata tauna vonem wayahina, e tauna an' ayaunena ena-ivaitei deina.☆

²⁹ Ka wamke, eha ematamatauta am ayaunena nihenina.

Kaiwadi, aitam wayahimia enuanua aituhu deina, dewana eha tunuhina. Enuanua deina, “Au niau an' ayaunena ihanuana, ka Paulo vonevoneu yauke nau-wawaniu vahitau-nana avihahaiei. Wayahina, au niau nau-yanahiu, ka tauna ya nuanua yau nuanua veimeyei deina.

☆ **10:26:** Sam 24:1. ☆ **10:28:** 1Ko 8:7.

³⁰ Aituhu yauke Yaubada anau-kaiwei au ma' wayahina, aviani iuna au niau ana pata yau nuanua wayahina mana-giboeu deina?"[✠]

³¹ Ka yau vona-nau-pata habuhabumi wayahimia taina. Aituhu uamam, o unimnim, o aituhu aviani udedewei, nau-wawanimi yami dewa habuhabuna wayahina Yaubada didigana uvo-vi-natei.[✠]

³² Kadu eha mani tomotau nuai uvitevitei, kadi me Iudea, o kadi me Girisi, o kadi mani tau ekalesia.[✠]

³³ Yau dewa unuani, vivane adewa-dadani tomotau habuhabui idewa-haiawa yau dewa habuhabui wayahia. Adedewei deina iuna eha au heta yau vidoha wayahina anuanua, kate tomotau habuhabui yai vidoha wayahina anuanua. Ka yau nuanua ananina tau i yai ito-yavuha iva-niahei.[✠]

11

¹ Nau-wawanimi yau dewa uvi-munie, vivane yami pai dune. Iuna Tau Ito-yavuha yana dewa avi-munie, vivane yau pai dune.[✠]

Kadu Aitam Me Korinita Yai Vi-tanai

² Ka ataina apa-vidovidohemi iuna tuta tuta unuanuanu, kadu viwavenena habuhabuna avaha avenemi uvi-ateteyei.

³ Ka nuanuau un'-anamanei onoto aitamoata aitamoata unununa vivane Tau Ito-yavuha, ka vavine unununa vivane onoto, ka Tau Ito-yavuha unununa vivane Yaubada.[✠]

✠ **10:30:** 1Ti 4:4. ✠ **10:31:** Kol 3:17. ✠ **10:32:** Rom 14:13.

✠ **10:33:** 1Ko 9:20-22. ✠ **11:1:** 1Ko 4:16. ✠ **11:3:** Nao 3:16; Epe 5:23.

4 Wayahina, aituhu avi onoto na tana-kabubuna viama, o kadi apa-taputapu, tauna unununa (vivane Tau Ito-yavuha) dewa-goyogoyoei deina.

5 Kate aituhu avi vavine na tana-kabubui iviama o kadi iapa-taputapu, tau'i ununui (vivane yai onoto) idewa-vidovidohei deina. Aituhu tau'i eha ai tana-kabubu, dewana apanai iupwa-ohoi deina, vivane dewana ini-yauyau omanei vaivinei wayahia.

6 Aituhu avi vavine eha yai nuanua ai tana-kabubu iweteweteni, akanai nau-wawani apanai itana-honoi. Kate aituhu vavinena ini-yauyau ivaniahei dewana wayahina deina, akanai nau-wawani ai tana-kabubu iweteweteni.

7 Ka avi tuta ononotoi iviama, tau'i eha nau-wawani ai tana-kabubu iweteweteni. Iuna tutana Yaubada onoto naona vevewanei, Yaubada tauna didigana wayahina ana dune vevewanei deina. Kate tutana Yaubada vavine naona vevewanei, Yaubada vevewanei onotona didigana wayahina.✧

8 Kadu kanamanei, onoto naona eha vavine naona nihenina wayahina ta-vin'-omo, kate vavine naona vivane onoto naona nihenina wayahina vin'-omo.✧

9 Kadue Yaubada eha onoto naona ta-vevewane vavine naona ya vidoha wayahina, kate vavine naona vevewanei onoto naona ya vidoha wayahina.

10 Wayahina, vaivinei nau-wawani pai nua-opu ununua iweteweteni, iviwaveneka yai onoto ivi-ateteyei deina. Kadu nau-wawani

✧ 11:7: Nao 1:26-27. ✧ 11:8: Nao 2:18-23.

idedewei deina iuna anelose bagibagi vaivinei yai dewa wayahia idunedune.

¹¹ Ka Kauvea ya ekalesia nihenina, vaivinei eha nau-wawani ai heta yai dewa ivi-nua-dadani. Kate tau'i ononotoi nui ividoha. Kadu ononotoi eha nau-wawani ai heta yai dewa ivi-nua-dadani. Tau'i vaivine nui ividoha.

¹² Vonana tunuhina iuna tuta naona wayahina vavine naona onoto naona nihenina wayahina vin'-omo. Ka tuta ataina wayahina onoto aitamoata aitamoata vaivinei nihenia wayahia ivin'-omo. Ka kadueyei dewa habuhabuna ivin'-omo Yaubada wayahina deina.

¹³ Itomi ami heta wayahimia vi-tanai-nana uvi-nua-dadani, unau-pata wayahina. Kaiwadi, aituhu vaivine eha ai tana-kabubu, ka aituhu iviama Yaubada wayahina, vaivinei yai dewaia tunuhina o eha?

¹⁴ Aituhu ana dune ana heta wayahina kanu-anua, aka pata kadueyei aituhu ononotoi apanai mamananai imamaei, tau'i ini-yauyau ivaniahei dewana wayahina, a?

¹⁵ Kate aituhu vaivine apanai mamananai imamaei, dewana vivane didigai, ka yai pai awa-dava. Iuna Yaubada vaivine apanai venei vivane ai tana-kabubu ahiahina wayahina.

¹⁶ Ka aituhu aitam wayahimia yam nuanua evi-vonavona dewana wayahina, ataina avonemi eha kadu aitam dewa wayahia mamae, kadu eha kadu aitam dewa mamae mani tomotau wayahia Yaubada ya ekalesia nihenia. Eha.

Paulo Ya Viwavenena Tapanono Wayahina

17 Ka aviani taina munina avonevonemi, eha adewa-haiawa wayahia, ka eha au pata an'-apa-vidovidohemi yami dewa wayahina. Iuna avi tuta itomi tau ekalesia unau-hohona, utapanono, yami dewa goyona yami dewa ahiahina ivane-tawanei.

18 Pai mini naona deina. Tupwai tomotau avaha imataedau avi tuta unau-hohona, utana-vewani yoko tunina tunina wayahia, kadue tupwana yai mataeda wayahiu deina avitumahanei. ☆

19 Vona ahiahina, tupwami nau-wawanimi yami dewa tunina, e dewaia wayahia aka pata kadueyei avi yoko Yaubada apa-vidovidohei deina.

20 Ka avi tuta unau-hohona, aituhu utana-vewani deina, dewana eha Sakarameni a venavenau tunutunuhina.

21 Itomi yami dewa tunina. Iuna avi tuta uamam, aitamoata aitamoata wayahimia am heta wayahima enuanua aninina wayahina eta-naoi, ka eha vavaneim o novunovum wayahia eta-potapota. Akaka, aitam wayahimia am enavovo, ka kadu aitam wayahimia wainaV enim-kavokavovo, evi-kwavakwava.

22 Aviani wayahina udedewei deina? Kaiwadi, itomi yami manua imamaei, a? Wayahina, nau-wawanimi uamam ka unimnim deinake yami manua nihenia, ka eha udedewe Sakarameni nihenina deina. Kaiwadi, aviani wayahina unuanua? Avi tuta udedewei deina, Yaubada ya tau ekalesia ubou-opuopuei, kadu tau paya-payaya wayahimia ai ini-yauyau uvenevenei.

☆ 11:18: 1Ko 1:10-12.

Ia! Kaiwadi, unuanua yami dewana wayahina an'-apa-vidovidohemi? Eha-ohota!

²³ Iuna aviani nonova aviwavenemi, Kauvea ana heta viwavenena veneu, vivane ioyomana a havia vi-nua-hauhauei, Kauvea Iesu palaua epei,

²⁴ ka avaha Yaubada nau-kaiwei wayahina, gibui ka ivona, “Ininiu taina awaehi yami vidoha wayahina. Dewa taina au pai nuana. Wayahina, udedewei deina.”

²⁵ Kadue avaha am-nana iakwa, vei epei, ka ivona, “Vei taina vivane awaeha vovouna avi-maiei dayahiu wayahina. Ka avi tuta vei taina wayahina unimnim, nau-wawanimi au pai nuana wayahina udedewei.”✧

²⁶ Iuna, avi tuta Sakarameni a palaua uamam, o kadi Sakarameni ana vei wayahina unimnim, dewana wayahina Kauvea yan' aniga uhaehaei a itoava ya mavi-havine wayahina.

²⁷ Wayahina, aituhu aviyaivia palauana iam-kavokavovo, o kadi aituhu aviyaivia Kauvea a vei-nana wayahina inim-kavokavovo, tau i yai dewa goyo-nana wayahina vivane Kauvea ininina kadu dayahina ibou-opuopuei.✧

²⁸ Akaka aitamoata aitamoata wayahikaia nau-wawanika naona nuaka kadune-vi-avini ahiahina, e munia Sakarameni kan'-am kadu kana-nim.

²⁹ Iuna aituhu aviyaivia eha Kauvea ininina wayahina inuanua, ka aituhu Sakarameni in'-am o ina-nim, yai dewana vivane dewa goyona Kauvea ininina wayahina. Ka apaina, ai dewa-yaiyai ivaniahei dewana wayahina.

✧ 11:25: NiT 24:6-8; Ebe 8:8-13. ✧ 11:27: Ebe 10:29.

³⁰ Ka tupwami udedewei deina, ka avaha kana-maney, dewana vivane iuna habuhabumi uaihanua ka uvi-kwanaha, kadu tupwai wayahimia avaha inusi.

³¹ Aituhu itoka tau ekalesia yawaika kanau-yanahi ahiahina, munia eha dewa-yaiyaina kavaniahe yaka dewa goyona wayahia.

³² Ka avi tuta Kauvea nau-yanahika, ka yaka goyona wayahina dewa-yaiyaieka, tauna ya nu-anua baina tanopia kanua-vinana. Aituhu kanua-vinana deina, apaina tauna eha itoka tau ma' tanopi ivihahaiei nui dewa-yaiyaieka.✧

³³ Wayahina, yaiiau, avi tuta itomi tau ekalesia unau-hohona Sakarameni un'-ania, nau-wawanimi mai-nuami, ka upotapotami.

³⁴ Ka aituhu aviyaivia am inavovo, tau nau-wawani naona yai manua nihenia iamam. E munia, avi tuta unau-hohona, eha dewa-yaiyai ivaniahe yai dewa-kavokavovo wayahina. Ka avi tuta anau-vi-taumi, aviani itupwa dewa taina wayahina avo-vi-mahetemi.

12

Am-venena-kavovo Ivin'-omo Nuana Ahihinata Wayahina

¹ Yaiiau, kadu aitam yami vi-tanai dewa ananina wayahina, vivane Yaubada yan' am-venena-kavovo nuaka wayahi. Ka eha yau nuanua dewaia wayahina mwagemwagemi umamae. Wayahina, ataina avo-vi-mahetemi.

✧ **11:32:** Ebe 12:5-6.

² Avaha uanamanei, tuta nonova wayahina papani novanovana nihenina umamaei, ka yami dewa vivane pai iwaodu vitupu wayahina uai-waodu. Ka pai iwaodu-naia eha ai pata ina-ipupu. Iuna eha yawayawai.✧

³ Wayahina, avonemi unononi. Aituhu aviyaivia yai vona ivin'-omo Yaubada Nuana wayahina, tau i eha ai pata ina-vona, "Yau nuanua Iesu bwanata vaniahei." Ka kadu deina, aituhu aviyaivia ivonavona, "Iesu vivane Kauvea," tau i yai ipupuna vin'-omo Nuana Ahihinata ana heta wayahina.✧

⁴ Yaubada yan' am-venena-kavovo nuaka wayahi tunina tunina, ka habuhabui ivin'-omo Nuana Ahihinata wayahina, ka tauna aitamoata-hoina.✧

⁵ Kadu deina, tau ekalesia yai paisewa am-vene-naia wayahia tunina tunina, ka tau i habuhabui ipaipaisewa Kauvea aitamoata-hoina wayahina.

⁶ Kadue bagibagi tunina tunina mamaei am-vene-naia wayahia, ka bagibagi habuhabui ivin'-omo Yaubada aitamoata-hoina wayahina, ka tauna paipaisewa tomotau habuhabuka nihenikaia.

⁷ Ka Yaubada tauna yan' am-venena-kavovo tau ekalesia aitamoata aitamoata wayahikaia veneveneka, iuna ya nuanua am-vene-naia wayahia kaivaiteka.

⁸ Aitam wayahikaia nua-uya vaniahei Nuana Ahihinata wayahina, e tauna ana pata mataedaka

✧ 12:2: Aba 2:18-19. ✧ 12:3: 1Io 4:2-3. ✧ 12:4: Rom 12:6.

deina. Ka kadu aitam wayahikaia anamana vaniahei Nuana Ahihinata wayahina, e tauna ana pata mataedaka deina.

⁹ Ka kadu aitam wayahikaia vitumahana bagibagina vaniahei Nuana aitamoata wayahina, e vo-pataka, ka kadu aitam bagibagi vaniahei Nuana aitamoata wayahina, e tauna ana pata tau kwanakwanaha na-vo-vi-aiaiei, ividoha.

¹⁰ Ka kadu aitam wayahikaia bagibagi vaniahei Nuana aitamoata wayahina, e tauna ana pata dewa-bagibagi-vainena na-vevewanei, ka kadu aitam ana pata n'-apa-taputapu, ka kadu aitam ana pata nua tunina tunina na-tana-vewani, n'-anamanei nua ahiahi o kadi nua goyogoyoi, ka kadu aitam ana pata ponaitu tunina tunina wayahia na-ipuipupu, ka eha aitam tuta nonova ponaitui ta-ipuipupu, ka kadu aitam ana pata ponaitu-naia na-nononi, e na-vo-vinei wayahika.

¹¹ Paisewana habuhabui ivin'-omo Nuana Ahihinata wayahina, ka tauna ana heta am-vene-naia vi-nua-dadani wayahika. Ka aituhu aviyaivia am-vene-naia ivaniahei, akanai ivaniahei, iuna Nuana Ahihinata venei deina.✧

¹² Vona ahiahina, aitamoata aitamoata wayahikaia ininika vivane aitamoata. Akanai, hutana habuhabui, kate inau-tamoia ininina aitamoata nihenina. Kadu Tau Ito-yavuha deinake.✧

¹³ Iuna itoka habuhabuka avaha bapitaiso kavaniahei Nuana Ahihinata aitamoata wayahina. Ka avaha kavi-yoko aitamoata,

✧ 12:11: 1Ko 7:7. ✧ 12:12: 1Ko 10:17.

itoai me Iudea ka itomi me Girisi, ka kadu tau paisewa-kavokavovo ka tau eha ipaipaisewa-kavokavovo. Ka Yaubada habuhabuka aka pai nim aitamoata veneka, vivane Nuana Ahihinata, ka avi tuta magaka n'-ayaya, aka pata kana-nim-iaua.*

¹⁴ Aituhu aitam onoto ininina wayahina kanu-anua, memeanina wayahikaia kadueyei ininina hutana habuhabui, eha aitamoata.

¹⁵ Wayahina, aituhu aena ipupu-kavokavovo, na-vona, “Yauke eha aitam nimana. Wayahina, yauke eha aitam hutana,” vonana eha tunuhina. Ka kadu aituhu aena na-vona deina, vonata eha ana pata ininina na-tana-vewani. Aena vivane aitam hutana.

¹⁶ Kadu deina, aituhu tanihana vona-kavokavovo, na-vona, “Yauke eha aitam matana. Wayahina, yauke eha aitam hutana,” vonana eha tunuhina. Iuna vonata eha ana pata ininina na-tana-vewani. Tanihana vivane aitam hutana.

¹⁷ Unuanua. Aituhu ininika mata-hoina, medeina kavaneneha? O aituhu ininika taniha-hoina, medeina kamau?

¹⁸ Vona ahiahina, Yaubada ininika vevewanei ahiahina, ka ininika hutana aitamoata aitamoata vo-vi-aiaia ya nuanua wayahika deina.

¹⁹ Aituhu onoto ininina hutana habuhabui ai dune aitamoata, tauna ininina aveta?

²⁰ Ka vona ahiahina, hutana habuhabuna ma-maei, kate Yaubada tubotuboi onoto-nana ininina aitamoata nihenina.

²¹ Wayahina, eha nau-wawani mataka nimaka na-vone, “Eha nuanuau wamke!” Kadu eha

* **12:13:** Gal 3:28.

nau-wawani ununuka aeka na-vone, “Eha nuan-uau wamke!”

²² Eha-ohota. Iuna itoka ininika nihenina hutana tupwai ai dune iaihanua, kate huta-naia ai paisewa mamaei, a? Ika, aituhu hutana eha, akanai yawaika eha.

²³ Kadu ininika hutana tupwai katana-kabubui, iuna kaini-yauyau wayahia, kate huta-naia ai paisewa vivane ananina, kadu didigai vidoha-tawanei.

²⁴ Kate mani huta ai paisewa tunina, akanai tomotau idudueyi. Wayahina, kadueyi Yaubada ininika vevewanei ahiahina, ka hutana habuhabui tubotuboi deina. Ka aituhu aitam huta ana dune eha ahiahina, akanai tauna huta-nana didigana ananina venei a paisewa wayahina.

²⁵ Ka eha tauna ya nuanua ininika katana-vewani, kate ya nuanua itoka nau-wawanika ininika hutana habuhabui kadune-vi-avini ahiahina.

²⁶ Wayahina, aituhu aitam huta viviha, akanai huta-naia habuhabui nui iviviha. O aituhu aitam huta apa-vidovidoha vaniahei, akanai hutana habuhabui nui idewa-haiawa.

²⁷ Ataina itomi tau ekalesia Tau Ito-yavuha ininina hutana deinake. Ka aitamoata aitamoata wayahimia aitam hutana.✧

²⁸ Ka ekalesia nihenina Yaubada avaha tupwai tomotau vi-nua-dadanei paisewa tunina tunina wayahina. Naona tau hae ananiai, v'-inuana tau apa-taputapu, v'-itonuna tau viwavenena, ka munia tau dewa-bagibagi-vainena idedewei,

✧ **12:27:** Rom 12:5.

kadu tau ai am-venena tau kwanakwanaha ivo-vi-aiaiei ividoha, kadu tau yai ai iai vaitei, kadu tau ai am-venena memeanina paisewa iveimeyei tunuhina, kadu tau ai pata movi tunina tunina wayahina iaipuipupu.✧

²⁹ Kaiwadi, habuhabuka tau hae? O habuhabuka tau apa-taputapu? O habuhabuka tau viwavenena? O habuhabuka aka pata dewa-bagibagi-vainena kadedewei? Eha.

³⁰ Kaiwadi, habuhabuka aka am-venena tau kwanakwanaha kavo-vi-aiaiei, ividoha? O habuhabuka aka pata movi vovou wayahia kaipuipupu? O habuhabuka aka pata movi vovou ivin'-omo kanononi, kavo-vinei yaiaka wayahi? Eha. Itoka aka am-venena tunina tunina.

³¹ Ka vona ahiahina, am-venena tupwai Nuana Ahihinata wayahina ai paisewa ananina, ka nau-wawanimi am-vene-naia udewa-dadani uvaniahei. Kate kadu aitam etawana mamaei, ka etawanana am-vene-naia habuhabui vane-tawanei. Unononi, etawanana avo-vi-mahetemi taina deina.✧

13

Etawana Ahiahina Vivane Dewa-vidovidoha

¹ Aituhu au pata tomotau movi kadu anelose movi wayahia aipuipupu, kate aituhu eha tomotau adewa-vidovidoha, yau vonaia vivane dewa-kavokavovo, aitam inava inavinavi-kavokavovo deina, o aitam bwegigi ivaivaini-kavokavovo deina.

✧ 12:28: Epe 4:11-12. ✧ 12:31: 1Ko 14:1.

² Kadue aituhu au am-venena apa-taputapu, o aituhu au pata Yaubada ya vi-nua-hauhau hivahivana habuhabuna anamane-yehai, o aituhu nua-uya habuhabuna wayahiuu, o aituhu vitumahana bagibagi-vainena wayahiuu mamaei au pata oya aveimeyei ine mani papania wayahina, kate aituhu eha tomotau adewa-vidovidohe, akanai yauke yau dewa habuhabui awakabi.✧

³ Kadue aituhu yau gugua habuhabui avo-patai tau payapayaya wayahia, o aituhu ininiu au havia wayahia awaehei ihaponei ai ananata nihenina, kate aituhu eha tomotau adewa-vidovidohe, yau dewa habuhabui awakabi.

⁴ Vona ahiahina, dewa-vidovidoha mani dewa habuhabui vane-tawanei. Dewa-vidovidoha a venavenau taina deinake. Aituhu dewa-vidovidoha wayahikaia mamaei, aka pata katoha-vi-anaika, kadu yaka dewa tomotau wayahia bigana. Aituhu dewa-vidovidoha wayahikaia mamaei, eha kavi-bwanou, eha kavona-vanevane, kadu eha kanua-vane.

⁵ Kadue eha kaipupu-kedewa tomotau wayahia, ka eha nau-wawanika kadewa-dadani mani tomotau yaka nuanua ana heta iveneveneka. Ka eha memeanina kanua-goyo, ka eha mani tomotau yai dewa goyona wayahikaia kanua-tania.

⁶ Aituhu dewa-vidovidoha wayahikaia mamaei, avi tuta mani tomotau dewa goyona ivaniahei, eha kadewa-haiawa dewana wayahina, kate avi tuta vona tunuhina vanevane,

✧ 13:2: Mat 17:20.

kadewa-haiawa.☆

⁷ Aituhu dewa-vidovidoha wayahikaia mamaei, tuta habuhabuna dewa goyona kabou-potei mani tomotau wayahia, ka tuta habuhabuna ahiahina kavitumahanei yaiaka yai dewa wayahi, ka tuta habuhabuna yaka nua-vaniaha nui dewa ahiahina kapotepotei, ka tuta habuhabuna kagwagwaheyei.☆

⁸ Dewa-vidovidoha eha na-iakwa, kate ma'-vavaha. Ataina apa-taputapu imamaei, kate apaina ina-iakwa. Ataina aitam am-venena mamaei, e tomotau ai pata ina-ipupu movi tunina tunina wayahina, kate apaina am-vene-nana na-iakwa. Ka ataina tupwai tomotau wayahia nua-uya mamaei, kate apaina nua-uyana na-iakwa.

⁹ Iuna ataina tuta wayahina yaka nua-uya tupwana, kadu avi apa-taputapu ataina ivin'-omo, eha dewa habuhabuna wayahina iapa-taputapue, kate tupwai ai heta.

¹⁰ Kate nua-uya ahihi-vainena omomo, ka tuta tepakaia wayahina nua-uyana kavaniahei. Ka auyewana wayahina yaka nua-uya ataina wayahikaia na-maiova.

¹¹ Yawaika tanopia deina. Tuta nonova wayahina yauke tevana. Wayahina, yau ipupu tevana yai ipupu deina, kadu yau nuanua tevana yai nuanua deina, kadu nuanua habuhabui abou-viwavei tevana ibou-viwavei deina. Kate tutana avi-onoto, tevana yai dewa habuhabuna ani-tawanei.

☆ 13:6: Rom 12:9. ☆ 13:7: 1Pi 4:8.

¹² Ka ataina itoka tau ekalesia tevana deina. Ataina eha Tau Ito-yavuha-nana ana dune kata-dune-vidoha. Aviani aka pata kadueyei tepana gelasi wayahina kadudueyei deina. Kate apaina tauna wayahina kavi-tepa-duedue. Ataina tuta yau anamana tupwana, kate apaina, auyewana wayahina, akanai tauna an'-anamane-vidohei, tauna avaha anamane-vidoheu aitamoata deina.

¹³ Ka yau vonana a pai nau-yehata wayahina taina. Dewa ananina aitonu ima'-vavaha, vivane vitumahana, ka nua-vaniaha, ka kadu dewa-vidovidoha. Ka aitonu wayahia dewa-vidovidoha vane-tawanei.✧

14

¹ Wayahina, nau-wawanimi ubebebewa naona tomotau udewa-vidovidohei. Kadu nau-wawanimi tuta aitamoata wayahina yami nuanua am-venena-kavovo Nuana Ahihinata wayahina uvaniahei. Ka kadu am-vene-naia habuhabui wayahia aitam hetana mamaei. Wayahina, yau nuanua wayahimi itomi Yaubada yana vona unaunau-waheyei.✧

Ponaitu Wahuma Ai Venavenau

² Iuna aituhu aviyaivia iaipuiipupu ponaitu wahuma wayahia, eha tomotau wayahia iaipuiipupu, kate tau Yaubada ana heta wayahina iaipuiipupu. Wayahina, eha aitam koiaka tanopia ana pata ponaituia inononi. Akanai, tau ipupu-naia nua-uya hivahivai iaipuiipupuei nuai wayahia, kate mani tomotau eha inua-hau.

✧ **13:13:** 1Te 1:3. ✧ **14:1:** 1Ko 12:31; 14:39.

³ Ka aituhu aviyaivia inaunau-wahe tunuhina, tau tomotau iaivaitei, ivo-vi-bagibagi, ivo-vi-vatui, kadu iaipupu-bigebigei.

⁴ Ka aituhu aviyaivia ponaitu wahuma wayahia iaipuiipupu, tau ai heta iaivaitei. Kate aituhu aviyaivia inaunau-wahe tunuhina, tau tau ekalesia habuhabui iaivaitei.

⁵ Aituhu aitamoata aitamoata wayahimia ami pata ponaitu vovoui ivin'-omo wayahimia Nuna Ahihinata wayahina uaipuiipupu, dewana wayahina uvo-vi-dewa-haiawiu. Kate yau nuanua ananina aitamoata aitamoata wayahimia ami pata unaunau-wahe tunuhina. Iuna tau yai paisewa inaunau-wahe tau yai paisewa ponaitu wayahia iaipuiipupu vane-tawanei. Aituhu tau ipupu-naia kadu ai pata ponaituia ivo-vinei, akanai tau ekalesia ai pata ividoha deina.

⁶ Unononi. Aituhu yauke aomo wayahimia, ka aituhu ponaitu wahuma wayahina aipupu wayahimia, medeina uvidoha dewana wayahina? Aituhu yau nuanua uvidoha yau dewa wayahina, akanai, nau-wawaniu nua-uya vovouna asi-vin'-omanei wayahimia, o kadi anamana vovouna avo-vi-mahetemi, o kadi apa-taputapu apa-taputapuemi, o kadi ami veimea aviwavenemi. Ka dewaia wayahia uvidoha.

⁷ Ka kadu aitam pai dune avenemi tumo o pai viam-toutou wayahina. Tau eha ai pata itoutou. Ka aituhu tomotau tumo ivaini-kavokavovoi, o aituhu pai viam-toutou inavi-kavokavovoi, medeina yaiai ahe iaheahe tunuhina? Eha ai pata.

⁸ O aituhu aviyaivia tau nau-havia ai bwegigi ivaini-kavokavovoi, medeina tau nau-havia in'-anamane nau-wawani havia wayahina ivo-vi-aiiaia? Eha ai pata.

⁹ Ka itoka tau ekalesia deinake. Aituhu ponaitu wahuma wayahina kaipuipupu, medeina yaiaka yaka vona an' anamana in'-anamanei? Aituhu kadedewei deina, yaka vona awakabina. Wayahina, nau-wawanika movikaia wayahia kaipuipupu.

¹⁰ Ka vona ahiahina, tanopi taina wayahina movi habu-vainei imamaei, tau vi-meagai tunina tunina ai pata taui movia inononi, in'-anamanei.

¹¹ Wayahina, aituhu koiaka movina wayahina ipuipupu wayahia, ka aituhu yauke eha movina at'-anamane, tauna aitau tau bwanibwani yauke wayahia deina, ka yauke kadu tau bwanibwani tauna wayahina deina.

¹² Avaha anamanemi yami nuanua am-venena-kavovo Nuana Ahihinata wayahina uvaniahei. Ka avi tuta itomi tau ekalesia unau-hohoni, nau-wawanimi am-vene-naia yaiami ina-ivaitei usi-vin'-omanei.

¹³ Ka aituhu aviyaivia wayahimia ami am-vene-naia ponaitu wahuma wayahia uaiipuipupu, taumi nau-wawanimi kadu uviana Yaubada ponaituia ai vo-vine n'-awaehemi uvaniahei, e ami pata yaiami uvo-vi-mahetei.

¹⁴ Aituhu ponaitu wahuma wayahina aviama, akanai nuau wayahina aviama, kate viamana an' anamana eha ata-nua-hau.

¹⁵ Wayahina, medeina avidoha? Etawana ainua ahiahina. Yauke nau-wawaniu nuau

wayahina aviama, kadu nau-wawaniu moviua aviama. Kadu deinake, nau-wawaniu nuau wayahina an'-ahe kadue nau-wawaniu moviua an'-ahe deina.

¹⁶ Avi tuta unau-hohona utapanono, tupwai tomotau imamaei, ka eha ponaituia wahuma wayahina it'-anamane. Wayahina, aituhu Yaubada unau-kaiwei nuami wayahina, tau nuai eha in'-am-hau. Wayahina, yami nau-kaiwa na-iakwa, tau eha ai pata in'-awaehe aitamoata wayahimia, ka eha ai pata ina-vona, "Ana pata deina".

¹⁷ Vona ahiahina, itomi ponaituia wahuma Yaubada wayahina unau-kaiwa nuami wayahina, ka eha uvitupu. Kate yaiami nui umamaei, tau medeina ividoha? Yami vona tau wayahia hivahivana.

¹⁸ Akanai, vona ahiahina, tuta tuta yauke taua ponaitu wahuma wayahia aipupupu, kadu yau ipupu wayahia tuta habuhabuna ka itomi yami ipupu wayahia tuta tupwai ai heta. Ka dewana wayahina Yaubada anau-kaiwei.

¹⁹ Kate yau nuanua yaka tapanono nihenina tunina. Avi tuta kanau-hohona katapanono, yauke yau nuanua ananina vona aitonuata ai heta aipupu movikaia, ka aituhu tomotau ai anamana inononi, ka aituhu yai etawana ividoha, akanai dewana dewa ahiahina. Aituhu ponaitu wahuma wayahina vona ai yau 10,000 aipupupu, medeina mani tau ekalesia ividoha? Eha ai pata.

²⁰ Yaiiau, eha nau-wawanimi unuanua ya-heyae deina. Aituhu dewa goyona wayahina, akanai itomi nau-wawanimi unuanua tevana

kikitumi deina. Kate aituhu dewa ahiahina wayahina, nau-wawanimi unuanua tomotau anani deina.☆

²¹ Iuna Iginuma nihenina Kauvea yana vona aitam mamaei, ivona,

“Apaina tau bwanibwani avi-tunei iomomo,
e mani movi wayahia yau yoko wayahia
yau vona ihaehaeyei.

Kate yau yoko eha yai nuanua
yau vonaia inononi,
ka eha yai nuanua ivi-munie.”

Kauvea ipupu deina.☆

²² Wayahina, kadueyei ponaitu tunina tunina iomomo iaiaya wayahi. Ka iaiaya-naia eha tau vitumahana wayahi ivin'-omo, kate ivin'-omo tau va-hamwahamwana ina-ivaitei ivitumahanei. Ka nau-wahe itoka tau ekalesia wayahika, eha tau va-hamwahamwana wayahi.

²³ Wayahina, aituhu itomi tau ekalesia habuhabumi unau-hohona utapanono, ka aituhu habuhabumi uvi-putu uaipui-pupu ponaitu tunina tunina wayahia, ka aituhu tupwai tomotau nui umimini, ka ponaituia eha it'-anamane, o aituhu tupwai eha yai vitumahana nui umimini, tau medeina inuanua? Akanai inuanua habuhabumi avaha uvi-kwavakwava, a?☆

²⁴ Kate aituhu habuhabumi movimia Yaubada yana vona uhaehaeyei, ka aituhu tau eha yai vitumahana nui umimini, akanai apaina, avaha

☆ **14:20:** Epe 4:14. ☆ **14:21:** Isa 28:11-12. ☆ **14:23:** Dew 2:13.

Yaubada yana vona habuhabumi wayahimia inononi, tau in'-anamanei tau tau goyogoyoi, kadu in'-anamanei nau-wawani inua-vinana.✧

²⁵ Kadu avi nuanua tuta nonova a itoava auyewana wayahina nuai nihenia ihivahivai, vo-kwayavonina Yaubada habuhabuna si-vin'-omane. Iakwa, e tomotau nau-wawani ipeu. Ka Yaubada iawa-davei, ka memeanina wayahia ina-vona, “Vona ahiahina, Yaubada nui umamaei baina!”

Tapanono A Venavenau Tunuhina

²⁶ Yaiiau, medeina yami etawana tapanono wayahina uvo-vi-aiaia ahiahina? Yami nau-hohona nihenina aitamoata aitamoata wayahimia yami paisewa tunina tunina mamaei. Wayahina, tupwami na ahemi uomomo, ka tupwami na viwavenemi uomomo, ka tupwami na si-vin'-omanami uomomo, ka tupwami na ponaitumi wahuma uomomo, ka tupwami na ponaitumi wahuma a vo-vine uomomo. Ka avonemi, nau-wawanimi dewa aitamoata aitamoata udedewei tau ekalesia habuhabui ai vidoha wayahina.✧

²⁷ Wayahina, aituhu tupwami yami nuanua ponaitu wahuma wayahina una-ipupu, akanai aitonuata wayahimia, eha habuhabumi. Wayahina, aitam wayahimia ena-ipupu. Na-iakwa, nau-wawanimi aitam wayahimia ponaituna evo-vinei yaiami wayahi. Na-iakwa, kadu aitam wayahimia am pata ena-ipupu. Nau-wawanimi dewana a venavenau uvi-munie deina.

✧ **14:24:** Ioni 16:8. ✧ **14:26:** 1Ko 12:8-10.

28 Kate aituhu eha aitam koiaka wayahimia ana pata ponaituia na-vo-vine, akanai tau ipupu habuhabumi nau-wawanimi ugenuana tuta tapanono nihenina. Ka akanai aitamoata aitamoata wayahimia am heta wayahima yam viana Yaubada wayahina evona-bigebigem.

29 Ka venavenau aitamoata wayahina deina, tau nau-wahe nau-wawani ainua o aitonu inau-nau-wahe. Ka tuta aitamoata wayahina yaiai tupwai nau-wawani ivanevaneneha ahiahina, e tau ai pata vonaia ivi-nua-dadani vivane Yaubada yana vona o eha.✧

30 Ka aituhu aitam tau nau-wahe manumanu-ena, ka aituhu nua-uya vovouna vin^l-omo tauna wayahina, tau nau-wahena mimini, ipuipupu nau-wawani na-genuana, e a niam n^l-awaehei na-mini na-ipupu.

31 Ka itomi tau nau-wahe aitamoata aitamoata ami pata unaunau-wahe deina, ka tau ekalesia habuhabumi ami pata nua-uya uvaniahei, kadu ami pata nuami na-vo-vi-vatui.

32 Itomi ami pata ugenuana, upotapotami, iuna tau nau-wahe ai pata nuai iveimeyei deina.

33 Itomi nau-wawanimi yami tapanono uveimeyei tunuhina deina, iuna Yaubada ya nuanua wayahika nua gomagomanina nui katapanono, ka eha kavo-vi-wahawahanika.

Ka ekalesia aitamoata aitamoata nihenina vaivinei ai veimea aitamoata mamaei, vivane

34 tau nau-wawani tapanono nihenina igenuana. Ka Mosese ya veimea nihenina

✧ 14:29: 1Te 5:21.

aitam veimea mamaei, ivona inua-opu, igenuana deina.✧

³⁵ Ka aituhu utapatapanono, ka aituhu aitam viwavenena vitana vin'-omo, ka aituhu vaivine yai nuanua viwavene-nana wayahina ivi-tanatanaiei, tauī nau-wawani ipotapota a itoava tapanono na-iakwa wayahina, e imavi-havine yai manua wayahina, e tauī yai onoto wayahina ivi-tanaiei, e yai onoto na-vo-vi-mahetei. Iuna aituhu vaivine ipuipupu tapanono nihenina, dewana vivane pai ini-yauyau wayahikaia.

³⁶ Aituhu yam nuanua evi-vonavona dewana wayahina, yau vi-tanai wayahima taina. Kaiwadi, Yaubada yana vona vin'-omo naona wamke wayahima? O kaiwadi, Iginuma eginumi? O kaiwadi, itomi tau ekalesia ami heta Yaubada yana vona unononi uanamanei? Eha-ohota.

³⁷ Wayahina, avonemi aituhu aviyaivia inuanua tauī tau nau-wahe, o tau apa-taputapu, o aituhu aviyaivia inuanua avaha am-venena-kavovo Nuana Ahihinata wayahina ivaniahei, tauī nau-wawani iawaehei aitamoata yau vonana wayahimia vivane Kauvea ya veimea itoka tau ekalesia habuhabuka wayahika.✧

³⁸ Ka aituhu aviyaivia yau vonana ivihahaiei, akanai Yaubada tomotauī vihahaiei.

³⁹ Wayahina, yaiau, nau-wawanimi yami nu-anua bagibagina mamaei unaunau-wahe, kate tauī ponaitu wahuma wayahina iaipuipupu eha uvito-pote.

✧ **14:34:** 1Ko 11:3; 1Ti 2:12. ✧ **14:37:** 1Io 4:6.

40 Ka yami tapanono nihenina, vona ananina taina. Itomi nau-wawanimi dewa aita-moata aitamoata udedewei tunuhina, ka eha uvitana-wahewahemi.

15

1-2 Yaiiau, nonova avin'-omo wayahimia ka Vaneana Ahiahina anaunau-waheyeyi wayahimia, ka uvitumahanei, ka ataina umimini-toyoina wayahina. Ka ataina yau nuanua Vaneana Ahiahina tanoi unuani. Ka aituhu Vaneana Ahiahina tanoi unua-vi-avini ahiahina, ka aituhu yami vitumahana eha awakabina, akanai tuyehana ana pata na-ito-yavuhimi.

3 Yau nau-wahe nihenina amataedami Tau Ito-yavuha aniga yaka dewa goyona wayahina, ka nonova Iginuma nihenina iapa-taputapuei, kadu iginumi deina. Vaneana vivane vane ananina.✧

4 Ka kadu Iesu tau matena iboui unuvovoa, ka auyewa aitonu iakwa, mini-havine, kadu Iginuma nihenina dewaia iapa-taputapuei, kadu iginumi deina.✧

5 Ka ya mini-havine iakwa, omo Pita wayahina ka ana dune si-vin'-omane, e Pita dueyeyi. Ka munia, tauna a tau hae anani ai yau 12 idueyeyi.^a
✧

✧ 15:3: Isa 53:5-12. ✧ 15:4: Mat 12:40; Dew 2:24-32. a 15:5: Tutana Paulo ivona a tau hae anani ai yau 12 tauna ipuipupu deina iuna mani tomotau yai yoko ivi-wahani deina. Kate avaha kanamane, Iudasa ana heta nau-vi-anigi. Wayahina, tuta-nana wayahina tau ai yau vivane 11. ✧ 15:5: Luk 24:34; Mat 28:16-17.

⁶ Ka munia, aitam tuta wayahina tauna vin'-omo tau vitumahana ai yau 500 kadu hetana wayahia idueyei. Ka tomtaui habuhabui wayahia yawayawai imamaei a itoava tuta ataina wayahina, ka tupwai wayahia avaha iaino-ainei, ini-tawaneka.

⁷ Iakwa, e vin'-omo tauna vaneina Iamesa wayahina, e tauna dueyei. Ka munia, tau hae anani habuhabui idueyei.✧

⁸ Ka pai nau-yehata wayahina, tauna vin'-omo yauke wayahiua, kadu yauke taua adueyei. Ka yauke yau tupua vi-kiwada omo deina, eha tevana yai tuta ahiahina ivaniahe itupua ahiahina deina.✧

⁹ Yauke pai nau-yehata avin'-omo, ka Iesu a tau hae anani habuhabui wayahia au wava kikituna. Iuna nonova yauke onoto manimaniniu, ka Yaubada ya tau vitumahanaia avo-vi-vihai. Eha nau-wawaniu avi-tau hae ananiu.✧

¹⁰ Kate Yaubada ate-nuanuaieu, e ivaiteu. Ka ataina avi-tau hae ananina aitam, iuna anau-kaiwa ananina yan' ate-nuanuai wayahiua, eha ata-dewa-kavokavovo. Ka apaisewa toyoina, ka yau paisewa tau hae anani habuhabui yai paisewa vane-tawanei. Ka eha yauke au heta apaisewa, kate Yaubada yan' ate-nuanuai niheniua paipaisewa ivaiteu.✧

¹¹ Wayahina, aituhu tau hae-naia inaunau-wahe unononi, o aituhu yauke anaunau-wahe unononi, itoai tau nau-wahe yama nau-wahe aitamoata, ka nau-wahena wayahina Tau Ito-yavuha uvitumahanei.

✧ **15:7:** Dew 1:3-4. ✧ **15:8:** Dew 9:3-6. ✧ **15:9:** Epe 3:8; 1Ti 1:15. ✧ **15:10:** 2Ko 11:23.

12 Avaha uanamanei Tau Ito-yavuha ya mini-havine anigea anaunau-waheyeyi wayahimia. Kate ataina tupwami uvonavona, “Eha ana pata tomotau anigea imini-havine.” Wayahina, yau vi-tanai wayahimia mamaei. Aviani wayahina uvonavona deina?

13 Aituhu yami vonana tunuhina, ka aituhu eha ana pata tomotau imini-havine, akanai eha ana pata Tau Ito-yavuha mini-havine.

14 Ka aituhu yami vonana tunuhina, ka aituhu Tau Ito-yavuha eha ta-mini-havine, akanai itoai yama nau-wahe vivane nau-wahe-kavokavovo, kadu itomi yami vitumahana vivane awakabina.

15 Ka kadue aituhu yami vonana tunuhina, itoai vivane tau hae vitupu Yaubada wayahina. Iuna avaha ahaeyemi vivane Yaubada Tau Ito-yavuha si-vi-mini-havinei anigea. Kate aituhu yami vonana tunuhina, eha ana pata Yaubada tauna na-si-vi-mini-havine anigea.

16 Iuna aituhu eha ana pata tomotau imini-havine anigea, akanai eha ana pata Tau Ito-yavuha na-mini-havine anigea.

17 Ka kadue, aituhu Tau Ito-yavuha eha ta-mini-havine, akanai itomi yami vitumahana vivane awakabina. Wayahina, ataina itomi yami dewa goyona mamaei. Eha aitam pai nua-piaha wayahimi.

18 Ka aituhu yami vonana tunuhina, e tau i habuhabui nonova Tau Ito-yavuha ivitumahanei, ka munia iaino-ainei, akanai tuta ataina wayahina avaha yawai-vavaha itutu-haini, a?

19 Ka aituhu itoka, Tau Ito-yavuha a tau vitumahana, yaka vidoha vin'-omo yaka tuta tanopi

taina ana heta wayahina, akanai, mani tomotau nau-wawani iate-nuanuaieka ka tauka ibegoka ananina.

²⁰ Kate avonemi, yami vonana eha tunuhina. Vona ahiahina, Tau Ito-yavuha avaha anigea mini-havine. Ka tauna tau'i habuhabui avaha iaino-ainei eta-naoi, ka tauna avaha yawai-vavaha vaniahei. Ka munia, tau'i kadu imini-havine aitamoata deina.

Tuta Pai Nau-yehata

²¹ Dewa ainua ivin'-omo onoto ainua wayahia. Tuta nonova wayahina aniga vin'-omo iuna onoto aitam yana dewa wayahina. Ka ataina mini-havine anigea vin'-omo iuna kadu aitam onoto yana dewa wayahina.✧

²² Ka vona ahiahina, itoka tomotau habuhabuka yaka aniga kavaniahei Adam wayahina, kadue itoka habuhabuka mini-havine kavaniahei Tau Ito-yavuha wayahina.

²³ Ka nau-wawanika kapotapota tuta ahiahina wayahina. Naona Tau Ito-yavuha nau-wawani mini-havine vaniahei. Ka munia, avi tuta tauna na-mavi-havine wayahina, tauka ya tomotau habuhabuka kadue mini-havine kavaniahei.✧

²⁴ Na-iakwa, tuta pai nau-yehata na-omo. Ka auyewana wayahina Tau Ito-yavuha ya pai veimea Amaka Yaubada na-vene-havinei. Kate naona Tau Ito-yavuha nau-wawani tauna a havia habuhabui, kadu yai bagibagi habuhabui, kadu yai pai veimea habuhabui na-vita-vovoni. Na-iakwa, e tauna ya pai veimea Amana na-vene-havinei.

✧ 15:21: Rom 5:12. ✧ 15:23: 1Te 4:16; SiV 20:5.

25 Tau Ito-yavuha nau-wawani dewa habuhabuna veimeyei a itoava tauna a havia aitamoata aitamoata bagibagi-tawanei wayahina.✧

26 Ka tauna a havia pai nau-yehata vivane Aniga ana heta. Wayahina, tuta pai nau-yehata wayahina, tauna kadu Aniga na-vita-vovoni.✧

27 Tau Ito-yavuha dewaia habuhabui ana pata, iuna

“Yaubada avaha dewa habuhabuna aena bou-opuei”

ka Yaubada awaehei na-veimeyei deina. Ka matainana nihenina ivona “dewa habuhabuna” kate vonana an' anamana eha Tau Ito-yavuha ana pata kadu Yaubada na-veimeye deina. Kate an' anamana vivane Yaubada dewa habuhabuna Tau Ito-yavuha aena boui akanai Tau Ito-yavuha na-veimeyei.✧

28 Ka avaha Tau Ito-yavuha tauna ya pai veimea Amana vene-havinei, akanai tauna ya nua-opu nui kadu Amana vi-ateteyei. Ka tuta pai nau-yehata wayahina, Yaubada tauna ya pai veimea habuhabuna na-veimeyei tunuhina deina.

Paulo Ya Pai Mini Naona Wayahina Mavi-havine

29 Wayahina, ataina yau pai mini naona wayahina amavi-havine. Aituhu eha ana pata to-motau imini-havine anigea, medeina kana-vona tau avaha ivi-bapitaiso tau aninigai wayahi

✧ 15:25: Mat 22:44. ✧ 15:26: SiV 20:14. ✧ 15:27: Sam 8:6.

wayahia? Aituhu eha ana pata tau aninigi imini-havine, aviani wayahina tomotau ivi-bapitaiso wayahi?^a

³⁰ O kadue itoai tau hae ananiai medeina? Aituhu eha ana pata anigea amini-havine, aviani wayahina vitana kadu inahe tunina tunina wayahina abebewewa ananina babau aitamoata aitamoata wayahina?[☆]

³¹ Vona ahiahina, auyewa aitamoata aitamoata wayahina yauke anianiga deina, iuna eha ani-hoina yawaiu avo-haini. Yaiiau, eha avitupu. Vonana vona tunuhina. Yauke adewa-haiawa wayahimi, iuna aivaitemi Tau Ito-yavuha Iesu yaka Kauvea uvitumahanei yau nau-wahe wayahina.

³² Ka nonova meagai Epesusi wayahina vahitau udaudana anau-haviei. Ka aituhu dewana adewei au nau-pata baina tanopia ana heta wayahina, avaha avi-kwavakwava ani-vainena, a? Medeina avidoha? Tupwai tomotau yai vona tana-minikuna ivona,

“Ataina nau-wawanika kadewa-haiawa,
kamam kadu kanimnim,
iuna ma-putua kan'-aniga.”

^a **15:29:** Eha memeanina mataina taina an' anamana kavaniahe. Kaiwadi, tupwai tau sinasinapui ivona nonova tomotau yai dewa deina. Avi tuta Vaneana Ahiahina inononi, ivitumahanei, munia inua-vita yai tupua-nenenehi wayahi, iuna tau mwagemwagei avaha ianiga. Wayahina, tuta tanoi wayahina, tomotau kadu aitam bapitaiso ivaniahei yai tupua-nenenehi wayahi. Kaiwadi, Yaubada awahehi idedewei deina o eha. Eha kat'-anamane.

[☆] **15:30:** Rom 8:36.

Ka aituhu eha ana pata tomotau anigea imini-havine, akanai, tomotau yai vona tana-minikunana vivane tunuhina.✧

³³ Kate vona tana-minikuna tunina avonemi, vivane,

“Tau yai dewa goyona ai pata
mani tomotau yai dewa tunuhina
ivi-goyoi.”

Wayahina, nau-wawanimi udune-vivinimi. Iuna tau vitupu imamaei, yai nuanua inonomi.

³⁴ Itomi nau-wawanimi umavi-havine nuanua tunuhina wayahina, ka yami dewa goyona ubou-ohoi. Avonemi deina iuna tupwai wayahimia mwagemwagemi Yaubada ya nuanua wayahina. Ka itomi tau vitumahana nau-wawanimi una-ini-yauyau tau tapanono mwagemwagei wayahi. Ka aituhu aviyaivia wayahimia sinasinapumi, akanai avaha yau vonana wayahina unua-hau.

Ininika Vovouna

³⁵ Kaiwadi tupwami vi-tanai taina uvi-tanatanaiei, una-vona, “Aituhu ana pata tomotau imini-havine, tau ai dune medeina? Ka avi inini wayahia?”

³⁶ Ka avonemi vi-tanai-nana mwagemwagena. Iuna aituhu tau baguna aitam waipei baguni, akanai waipeina nau-wawani n'-aniga tanopia, e munia wanohina vovouna ivin'-omo kadu yawaina vovouna itabotabo.✧

✧ **15:32:** Isa 22:13. ✧ **15:36:** Ioni 12:24.

³⁷ Ka avi tuta tau baguna ibagubaguna, tau i eha uana houna ibagubaguna. Eha-ohota. Tai i utuna pwavuna ibagubaguna, witiV utuna deina, o kadi pegapega utuna deina.

³⁸ Ka munia, ininina vovouna boui, avi dune vovouna Yaubada ya nuanua wayahina deina.

³⁹ Ka kadu aitam pai dune wayahikaia vahitau wayahia mamaei. Vahitau tunina tunina, ka kadu vioi tunina tunina. Eha aitamoata. Itoka tomotau vioka aitam, ka vahitau vioi tunina, kadue manua vioi tunina, kadue iana vioi tunina.

⁴⁰ Ka kadu aitam yaka pai dune wahuma mamaei. Iuna Yaubada ya vevevana tupwai imamaei wahuma, kadue tupwai imamaei tanopia. Ka tau i wahuma imamaei didigai tunina, kadue tau i tanopia imamaei didigai tunina.

⁴¹ Ka babau didigana aitam, ka wahava didigana tunina, kadue wadima aitamoata aitamoata didigai tunina tunina.

⁴² Ka avi tuta tomotau imini-havine anigea, tau i yai vin'-omana deina. Avi tuta aitam tomotau inusi, yaiana iomo, e tau matena iepe itavuni. Idedewei deina iuna tomotauna ininina aninigana. Kate mini-havine an' auyewa wayahina, tomotauna na-omo, ka ininina vovouna ma'-vavaha.

⁴³ Tutana tomotauna yaiana tau matena itavuni, vona ahiahina, tau matena ihanuana, ka ana dune goyona. Kate mini-havine an' auyewa wayahina, ininina vovouna didigana nui na-omo, ka kadu bagibagina.✧

⁴⁴ Ka tau mate-nana itavuni naona tomotau-nana ininina ya tupua wayahina

✧ 15:43: Pili 3:20-21.

tanopi wayahina vin'-omo. Kate mini-havine an' auyewa wayahina, ininina vovouna nua wayahina na-omo.

Wayahina, aituhu ininika tanopi wayahina imamaei, vona ahiahina, ininika nua wayahina imamaei deinake.

⁴⁵ Ka Iginuma nihenina mataina kavaniahei deina, ivona,

“Onoto naona, ana wava Adam,
yawaina epei, yawawawaina.”

Ka “Adam” pai nau-yehata vivane aitam nua, e tauna yawaika veneveneka.✧

⁴⁶ Dewaia nua wayahina ivin'-omo eha ieta-naonao, kate dewaia tanopi wayahina ivin'-omo ieta-naonao. Ka munia, dewaia nua wayahina ivin'-omo.

⁴⁷ Ka kadueyei, apunava tanopi wayahina Yaubada onoto naona vevewanei deina. Kate onoto v'-inuana wahuma wayahina opu-me deina.

⁴⁸⁻⁴⁹ Onoto naona tanopi wayahina vivane waka. Ka yaka tupua kadu ininika ivin'-omo tauna wayahina. Wayahina, itoka ininika tauna ininina aitamoata. Ka avi tuta yawaika na-iakwa wayahina, akanai kan'-aniga, tauna deina. Kadu onoto-nana opu-me wahuma wayahina deinake. Ataina tuta tauna avaha yawai-vavaha vaniahei ininina vovouna wayahina. Ka aituhu aviyaivia wayahikaia kavitumahanei, akanai itoka ininika vovouna tauna ininina vovouna aitamoata deina kavaniahei.

✧ 15:45: Nao 2:7.

⁵⁰ Ataina ahaeyemi, tomotau vioka kadu dayahika eha ai pata Yaubada ya pai veimea wahuma nihenina imamae. Iuna idavudavuni. Kadu eha Yaubada ya nuanua ininika taina idavudavuni yawai-vavaha ivaniahei.

⁵¹ Wayahina, unononi, ka vona hivahivana aitam avo-vi-mahetemi, un'-anamanei. Eha nau-wawanika habuhabuka kaino-aineka! Ka vona ahiahina, habuhabuka nau-wawanika ininika na-vo-vinei.✧ ✧

⁵² Ka vo-vina-nana vo-kwayavonina na-omo. Ika, vonaina a vin'-omana deina. Ka auyewana wayahina, anelose bwegigi pai nau-yehata na-vaini. Na-iakwa, tau aninigai imini-havine na inini ma'-vavaha ivin'-omo. Na-iakwa, e Yaubada habuhabuka ininika na-vo-vinei tuna.

⁵³ Dewaia nau-wawani ivin'-omo deina, iuna ataina nuaka ininika davudavuni iweteweteni. Ka eha aka pata yawai-vavaha kavaniahe deinake. Wayahina, nuaka nau-wawani inini ima'-vavaha iweteni. Na-iakwa, aka pata yawai-vavaha kanuinu.✧

⁵⁴ Ka avi tuta nuaka ininika davudavuni ini-tawanei, ka avaha ininika ima'-vavaha iweteni, akanai auyewana wayahina aitam vona nonova iginumi mamaei an' anamana vaniahei. Vonana ivona,

“Kaiwa ananina!

Dewa-haiawa avaha Aniga tononi-yehai,
iakwa.”✧

✧ **15:51:** Mat 24:31. ✧ **15:51:** 1Te 4:15-17. ✧ **15:53:** 2Ko 5:4.

✧ **15:54:** Isa 25:8.

⁵⁵ Ka kadu aitam vona Iginuma nihenina ma-maei, vivane vi-tanai, ivona,

“O Aniga,
ataina yam nua-vane ka yam bagibagi aveta?”

Akanai, ina-iakwa!✠

⁵⁶ Nonova a itoava auyewana wayahina, Aniga ya bagibagi vi-goyoka ka bagibagi-nana vin'-omo dewa goyona wayahina, kadu dewa goyona a bagibagi vin'-omo Mosesese ya veimea wayahina.✠

⁵⁷ Kate kaiwa ananina Yaubada wayahina! Iuna Iesu yaka Tau Ito-yavuha avaha dewa goyona vi-peui. Ka Yaubada awaehaka Iesu yana dewa wayahina kavidoha-vavaha, kadu kadewa-haiawa-vavaha.

⁵⁸ Wayahina, yaiau ahiahimi, itomi nau-wawanimi tuta habuhabuna wayahina umini-toyoina. Eha aitam aviani un'-awaehe na-vo-tahomi una-novo yami vitumahana wayahina. Eha-ohota. Ka kadue yaiau, aituhu tuta habuhabuna wayahina Kauvea ya paisewa uawaehemi udedewei, vona ahiahina, paisewana eha awakabina. Iuna avaha uanamanei, aituhu ataina Kauvea ya paisewa upaipaisewei, apaina ami nau-pata potapotami uvaniahei.

16

Me Korinita Yai Am-venena-kavovo

¹ Kadu aitam pai mini mamaei, vivane itomi yami am-venena-kavovo Yaubada ya tomotau

✠ 15:55: Ose 13:14. ✠ 15:56: Rom 7:13.

Ierusalem imamaei wayahi. Ataina itomi ami veimea aveimeyemi udedewei avaha me Galatia aveimeyei idedewei aitamoata deina.✧

² Yami auyewa tapanono wayahina, wiki aitamoata aitamoata nihenia, aitamoata aitamoata wayahimia nau-wawanimi yami kina utana-vewani ami nau-pata awaehemi deina, ka kinaia tupwai upoy¹-avini yami am-venena-kavovo wayahina. Ka kinaia ugwaugwau imamaei, upotapota a itoava avin¹-omo wayahimia wayahina. Ka auyewana wayahina, avaha yama paisewa uvo-vi-meani deina.

³ Ka itomi tau ekalesia nau-wawanimi yami ononotoi aitonuata uvi-nua-dadanei vivane yami tau dune. Ka yauke yami tau dune-naia yai pai mataeda me Ierusalem wayahi aginumi avenei. Na-iakwa, avi-tunei ina-vane meagai Ierusalem wayahina, e yami kinaia tau vi-meagai-naia in¹-am-veneneyei.

⁴ Ka aituhu itomi yami nuanua kadu yauke tau dune-naia nui avanevane, akanai kawaehei aitamoata deina, e yauke aeta-naoi Ierusalem wayahina.

Paulo Ya Vi-nua-hauhau

⁵ Ataina tuta nuanuau naona papani Masedonia atutu-vivini, ka ekalesia-naia anau-vi-tai. Na-iakwa, an¹-omo wayahimia.✧

⁶ Ka apaina, avaha avaniahami, kaiwadi, nui kamamaei auyewa tupwai nihenia. Ka aituhu apaina ana dune ahiahina wayahiu, akanai

✧ **16:1:** Rom 15:25-26; 2Ko 8:1-9. ✧ **16:5:** Dew 19:21.

kwadudu ana tuta a wahava aitonuata nui kama-maei. Ka avi tuta kwadudu ana tuta na-iakwa, akanai itomi ami pata una-ivaiteu yau nae wayahina, avi meagai wayahina o avi papani wayahina Yaubada vi-tuneu ana-ne.✠

⁷ Yau nuanua apaina adueyemi iuna ataina eha yau nuanua avin'-omo wayahimia, anau-vi-taumi. Aituhu ataina avin'-omo, yaka tuta kutakutana, ka eha aka pata kanau-basekwa ahiahina. Ka aituhu yaka Kauvea ya nuanua, yau nuanua tuta tupwana bana mamanaina nui kamamaei, e aka pata kanau-basekwa ahiahina deina.

⁸ Ataina tuta yauke meagai Epesusi wayahina amamaei. Ka yau nuanua baina amamaei a itoava Penitekosi Toneina na-iakwa wayahina.

⁹ Yau nuanua amamaei meagai taina. Iuna Yaubada avaha ivaiteu au pata paisewa ananina apaipaisewei baina. Ka tau vi-meagai habuhabui au havia kadu imamaei.✠

¹⁰ Ka aituhu Timoti na-omo wayahimia, nau-wawanimi udewa-tomotauei. Iuna tauna Kauvea ya paisewa paipaisewa, yauke deina.✠

¹¹ Kadu nau-wawanimi udune-vi-avini, ka eha uvihahaiei. Ka avi tuta tauna ya nuanua mavi-havine wayahiua, akanai itomi nau-wawanimi nua gomagomanina nui tauna kadu mani vavaneika nui una-ivaitei yai nae wayahina. Yauke baina tauna yaiaka nui apotapotai imavi-havine wayahiua.✠

¹² Vane taina aka niam ana wava Apolosi

✠ **16:6:** Rom 15:24. ✠ **16:9:** Dew 19:8-10; 2Ko 2:12. ✠ **16:10:** 1Ko 4:17. ✠ **16:11:** 1Ti 4:12.

wayahina. Yauke yau nuanua ananina tauna yaiaka tupwai nui ivin'-omo wayahimia. Kate ataina tauna eha ya nuanua deina. Kate apaina, kadi aituhu tuta ahiahina vaniahei, akanai tauna kadu na-omo wayahimia.✧

13 Yau nuanua itomi wayahimi deina. Tuta habuhabuna nau-wawanimi udune-vivinimi. Kadu umini-toyoina yami vitumahana wayahina. Eha umatamatauta, kate un'-ate-vatu, kadu ubagibagi.

14 Kadu aviani udedewei, nau-wawanimi dewa-vidovidoha wayahina udedewei.

15 Sitepanasi kadu tauna yana yoko wayahimia imamaei avaha uanamanei. Ka tauī Tau Ito-yavuha a tau vitumahana naona itomi yami papani Akaia nihenina. Kadu nonova a itoava tuta ataina wayahina, tauī yai paisewa ananina wayahina tau ekalesia iaivaitei. Wayahina, ataina agwagwaheyemi✧

16 yai vona wayahimia unononi. Kadu aituhu mani tau ekalesia nui umamaei, aituhu tauī yai dewa aitamoata deina, nau-wawanimi uvi-ateteyei. O aituhu aviyaivia ivi-putu Kauvea ya paisewa idedewei, kadu aituhu ipaipaisewa toyoina, akanai yai pai dune uvi-munieī.

17 Nonova Sitepanasi, ka Potunatusi, ka Akaikusi uvi-tunei iomo baina wayahiua. Ka tutana ivin'-omo adueyei, vona ahiahina, adewa-haiawa ananina. Iuna aviani avi-kutakuta wayahimia, tauī wayahia avaniahei.

✧ 16:12: 1Ko 3:6. ✧ 16:15: 1Ko 1:16.

18 Iuna tau i nuau ivo-vi-vovoui, kadu nuami idedewei deina. Ka aituhu aviyaivia yai dewa tunutunuhina ononotoi deina, akanai nau-wawanika ai wava kasi-nai.

19 Tau ekalesia habuhabui papani Asia nihenina yai nuanua yai nau-kaiwa wayahimia atotohi yami leta taina nihenina. Kadu Akuila ka Pirisikila yai nau-kaiwa ananina yaka Kauvea nihenina iva-tawanei na-omo wayahimia. Ka tau ekalesia habuhabui inau-hohona itapanono yai manua nihenina, tau kadue inau-kaiwemi.✧

20 Ka tau ekalesia habuhabui baina meagai Epesusi inau-kaiwemi aitamoata deina. Yau nuanua habuhabumi unau-kaiwemi mao ahihinata wayahina.

21 Ka nau-kaiwa taina wayahimia yauke Paulo, nimaua aginumi.

22 Aituhu aviyaivia eha Kauvea idewa-nuanuaie, akanai yau viana vivane Yaubada na-bwanatai. Maranata, a vo-vina, “O Kauvea, evisina”.✧

23 Kadu aviama itomi am-venena awawaehina uvaniahei Kauvea Iesu wayahina.

24 Ka yauke yau dewa-vidovidoha itomi aitamoota aitamoata wayahimia Tau Ito-yavuha Iesu a wavea.

Ana pata deina.

Yauke Paulo

✧ 16:19: Dew 18:2, 18, 26. ✧ 16:22: Gal 1:8-9; SiV 22:20.

Awaeha Vovouna Minaveha Movia
The New Testament in the Minaveha Language of
Papua New Guinea
Nupela Testamen long tokples Minaveha long Niugini
copyright © 2008 Wycliffe Bible Translators, Inc.

Language: Minaveha

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0. You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2018-04-23

PDF generated using Haiola and XeLaTeX on 18 Apr 2025 from source files dated 31 Aug 2023

b67aeef-7e9d-566a-9ff5-cb22ab7e2ea4